

hh

8296

N

GOEDANG TJERITA

Terbit

Sabtu tg. 1 dan 15 Gop Sudan
Kant. Redactie & Administratieve
Poststempel no. 43 — Batavia-C.

No. 2 — MAART 1 — 1949

☆ TJOE BO KIM SO

Olehr: KWOK LAY YEN

小說倉庫

13

272 585 T73

GOEDANG TJERITA

HARGA ABONNEMENT :

Etjeran per djilid	f 2.25
Satoe boel	„ 4.50
Sekwartaal	„ 12.—

BIBLIOTHEEK KITLV



0064 4920

Bisa ber... ~~ssanan~~ **TJILIK ROMANS** terbit saben boelan, boeat jang soeda berlangganan **GOEDANG TJERITA** tjoema tambah f 4.50 boeat sekwartaal, boekan Abonné **GOEDANG TJERITA** sekwartaal f 6.—

ADVERTENTIE :

1 pag.	f 60.—	$\frac{1}{2}$ pag.	f 35.—
$\frac{3}{4}$ pag.	f 20.—	Omslag dalem ...	f 80.—
Omslag blakang 2 kleur			f 100.—

Si Nona Merah . . .

oleh: Pouw Kioe An.

Moentjoel dalem **TJILIK ROMANS**-Februari-nummer tebel 125 pagina.



Penoeh dengen:

Psychologie, Filosofie, Kadjinakaan,
Sensatie dan Romantisch.



Harga p. djilid f 3.— teritoeng ongk. aanget.
Berlangganan **Tjilik Romans** p. kwart. f 6.—

Pembajaran lebih dahoeloe.



ADM. „GOEDANG TJERITA”

Posttrommel 63 — Batavia-C.

dan di antero toko boekoe di seloeroehnja Indonesia.



hh. 8296-N

TJOE BO KIM SO

atawa

SATOE PERTJIDRAHAN JANG BERACHIR BAIK

(Samboengan „Goedang Tjerita” No. 12)

Oleh: KWO LAY YEN

Tjie-hiong-piao Tam Swat Yong oetjapken itoe perkatahan pedes lantaran tersoeroeng oleh ha-wa napsoe amarah besar, hingga ia tida mempoenjai kasempatan boewat berpikir lebih mateng; tetapi satelah itoe perkatahan dioetjapken, dalem hatinya merasa menjesel, kerna apa goenanja oetjapken perkatahan keras? Paling betoel djatoken padanja dengen mengandel sama ilmoe kapandean sendiri. Tetapi perkatahan soeda dikaloewarken, hingga menjesel poen tida ada goenanja. Ngo-in-pang-djit See Tjong Pin oendjoek roepa seperti orang kaget.

„Ah, ah! kaoe ini djadi poetrinja Tjoe-bo-kim-so Tam Tjoe Sian Lo-eng-hiong!” kata ia dengen pengrasahan hormat tertjampoer takoet, „akoe soeda lama denger iapoenna nama jang besar. „Apa jang Kim Toa Naynay bilang, semoewanja bener kaloe dibilitjaraken dengen berdasar sama tjengli, saharoes-nja akoe moesti menerima dosa dengen kepala di-toendoekin, tjoema sadja Kim Toa Naynay tiada menjaksiken bagimana keadahannja pada waktoe kita bertempoer, kaloe sadja akoe masih ada djalan boewat idoep, pasti sekali akoe tida brani goenaken itoe sendjata resia, hingga melanggar larangan besar di kalangan kang-ouw, dan orang-orang dari kala-

ngan Boelim anggep akoe terlaloe kedjem dan telengas, sama sekali tida bisa mengasi koetika pada laen orang. Akoe ini melaenken dateng menoeloengin pada Kim-to Boe Lam Hin jang mendjadi moerid-koe. Boe Lam Hin didesek keras oleh Kim Toaya hingga ia dateng minta pertoeloengan padakoe jang mendjadi goeroenja, satadinja akoe poen berniat kasi sedikit pengadjaran soepaja ia taoe tida bisa sa-soeka-soekanja dan oendoerken diri. Aken tetapi Kim Toaya poenja tjara jang kaliwatan, sedikit poen tida maoe kasi koetika pada laen orang, tida maoe kasi koetika boewat laen orang lindoengken moekanja, akoe rasa tida perdoeli siapa djoega, tida nanti bisa menahan sabar, akoe kerna terlaloe didesek dengan apa boleh boewat goenaken itoe daja oepaja paling achir, boewat membelaken djiwakoe jang kolot ini, berbareng melindoengin djoega roemah tangganja Boe Lam Hin. Tentang keadilan ada sama orang banjak, tida nanti bisa barang poetih dibalik mendjadi item.

„Dari sebab Kim Toa Naynay ada poetrinja satoe achli silat ternama Tjoe-bo-kim-so Tam Lo-engthiong, kaloe menoeroet akoe poenja pemandangan, ini oeroesan gampang sekali dioeroesnja, sebab biar poen sampe di oedjoeng langit, selamanja tjengli moesti dipake, kita orang siarken soerat oendangan me NGOENDANG pada orang toewa-toewa dari kalangan ilmoe silat di Kangsouw, Tjiatkang, Ouwlam dan Ouwpak, beber ini oeroesan dari bermoela sampe di achirnya dengen teroes terang di atas medja, kasiken bebrapa enghiong jang ternama djadi jury dan timbang ini oeroesan. dengen begitoe, akoe rasa aken didapetken satoe keadilan, tida bisa disangkal bahoewa Kim Toaya binasa di tangankoe, tjoema sadja hal ini soeda dilakoeken tida bisa diperbaekin lagi; aken tetapi akoe brani berboewat brani tanggoeng

djawab, bila poetoesannja orang banjak akoe jang bersala, terlaloe kedjem dan amat telengas, tida perloe memake tangannja laen orang, di hadepannja itoe achli-achli silat ternama, akoe aken abisken djiwa sendiri. Kim Toa Naynay, akoe jang soeda beroemoer begini toewa, apa jang akoe bilang bisa dipertjaja dan pasti sekali tida aken menjesel di blakang hari. Kim Toa Naynay, akoe poenja tjara memberesken ini bagimana bisa dipake atawa tida? Kaoe sendiri ada tjara laen jang lebih baek, akoe bersedia boewat pasang koeping."

Tjie-hiong-piao Tam Swat Yong bersenjoem ewa.

„See Losoe, akoe hatoerken banjak trima kasi atas kaoe poenja maksoed jang baek,” kata ia dengan soewara menjindir, „itoe satoe tanda jang kaoe maoe mengalah, boewat mana akoe bersoekoer padamoe sampe di dasarnja hati jang paling dalem. Tjoema sadja ada soeatoe hal jang kaoe haroes mengarti terang, baroesan dengen bernapsoe tida merasa lagi akoe soeda seboet ajahkoe; tetapi kaoe haroes mengarti dengen djelas, sama sekali akoe tida bermaksoed maoe goenaken namanja ajahkoe atawa pengroehnja boewat bitjara sama kaoe, itoelah ada oeroesan di hari kamoedian, malem ini poenja oeroesan tjoema bisa dioeroes sekarang djoega, kaoe haroes mengarti, poetrinja Tjoe-bo-kim-so Tam Tjoe Sian, istrinja Kie-boen-kiam Kim Boen Kiem, boekannja satoe prampoewan lemah dan tida mempoenja ilmoe kapandean, pengetjoet dan takoet mati, ini waktoe kita boleh tida oesa bitjaraken tentang kabeneran dan kasalahan, tentang keadilan, akoe poenja maksoed kadatengan ka sini tida laen maoe membales sakit hatinja soewamikoe, laen-laen oeroesan akoe tida maoe ambil perdoeli, tida perdoeli soewamikoe bersala dan berlakoe kaliwatan, Kim Boen Kiem ada akoe poenja soewami tertjinta, kaloe ia mati.

akoe tida bisa tinggal idoep sendirian. Dari sebab sekarang ia binasa di tangannja moesoe, akoe jang mendjadi istrinja berlaloe dan meninggalken kota Yangtjioe, akoe tida poenja moeka boewat bertemoe orang! Orang she See, akoe dateng di sini tida maoe lama-lama, hanja maoe adjar kenal sama kaoe poenja sendjata resia, Ngo-in-pang-djit liap-hoen-teng jang sanget lihay!"

Berkata sampe di sini dengen tida berlakoe soeng-kan lagi ia tjaboet kaloewar pedangnya dari saroeng dan tjekel dalem tangannja. Itoe waktoe Ngo-in-pang-djit See Tjong Pin djadi serba sala, doeloean ia sama sekali tida taoe bahoewa istrinja Kie-boenkiam Kim Boen Kiem asal dari mana, ia tjoema taoe sadja ia paham ilmoe silat dan boekan pram-poewan biasa seperti kabanjakan, sekarang baroe ia dapet taoe bahoewa ia ada poetrinja Tjoe-bo-kim-so Kim-sie-souw Tam Tjoe Sian, dengen lantas ia djadi sanget terprandjat. Biar poen Tam Swat Yong soeda bilang ia boekannja maoe mengandel sama nama ajahnja jang besar, tetapi diam-diam ia anggep Tam Swat Yong dengen sengadja kasi taoe bahoewa dirinja ada poetrinja Tjoe-bo-kim-so jang sanget dimaloein orang. See Tjong Pin sekali poen dengen mengandel sama itoe sendjata resia mendjagoin di kalangan kang-ouw dalem banjak taon; tetapi dengen sasoenggoenja ia tida sembarangan goenaken itoe, djikaloe boekannja sanget terpaksa, apabila soeda tida ada lagi laen djalan boewat toeloeng djiwanja dari kabinasahan. Kaloe di-itoeng dalem saoemoer idoepnja ia baroe goenaken tiga kali. Aken tetapi Tjoe-bo-kim-so Kim-sie-souw Tam Tjoe Sian, sasoenggoenja boekan orang jang boleh diboewat permaenan, sekarang ia soeda boenoeh mati mantoenja, soeda tentoe boekan perkara jang bisa diberesken begitoe sadja, beroentoeng ia berada di fihak bener,

ia sama sekali boekannja sengadja maoein djiwanja Kim Boen Kiem, hanja terpaksa lantaran maoe toe-loeng djiwanja sendiri, kaloe sadja Kie-boen-kiam Kim Boen Kiem tida terlaloe mendesek padanja nis-tjaja ia tida nanti goenaken itoe sendjata resia jang sanget lihay. Pendek, semoewa kasalahan boekan ia jang haroes tanggoeng.

Sekarang istrinja Kie-boen-kiam Kim Boen Kiem dateng maoe bikin pembalesan atas kamatiannja sang soewami, itoelah ada soeatoe hal jang memang sa-pantesnja, di kalangan kang-ouw tentoe hormatken saorang prampoewan jang begitoe gaga, brani hadep-ken kamatiian boewat membales sakit hatinja sang soewami, djangan kata lagi orang-orang di kalangan Boelim jang mengoetamaken kapatoetan dan ke-adilan. Oleh kerna ia dateng dengen maksoed bikin pembalesan atas kamatiian soewaminja, tentoe sadja ia tida maoe berlakoe moerah, hingga kaloe ia ter-desek dan tida goenaken liap-hoen-teng boewat losken diri dari tangannja Tam Swat Yong, sabalik-nja ia sendiri jang bisa binasa. Samentara kaloe ia goenaken liap-hoen-teng, kadjadian Tam Swat Yong binasa lagi di tangannja, itoe waktoe Tjoe-bo-kim-so tida nanti bisa mengampoenin lagi padanja, pertama lantaran ia soeda boenoeh mantoenja, dan sekarang ia boenoeh lagi poetrinja, dengen begitoe, pasti se-kali ia aken ngalamken perkara heibat, kena dibina-saken oleh Tjoe-bo-kim-so Tam Tjoe Sian. Inilaun djadi serba sala boewat ianja, pergi dateng ia moesti djadi binasa di tangan orang, maka sabisanja ia me-nahan napsoe amarah dan marendah.

„Kim Toa Naynay, sekarang akoe berada dalem kadoedoekan sabagi kaoe poenja moesoeh,” kata ia, „hingga tida baek kaloe akoe terlaloe seselken diri; aken tetapi ini malem akoe tida ada niatan bertem-poer, kaloe kaoe tida maoe pergi oendang kaoe poe-

nja ajah dateng ka sini, akoe sendiri nanti kirim soerat oendangan minta ia dateng ka sini boewat katemoeken akoe. Ini malem akoe akoeh soeda dibikin kadjoengkel dalem kaoe poenja tangan. Tjoema karewelan dari kadoewa fihak tida bisa diberesken dengen setjara begitoe, masi haroes dipotoesken dengen memake keadilan. Kim Toa Naynay, kaoe djanginan sala paham, kaoe boekannja saorang prampowan lemah dan tida mempoenjai kapandean, sedeng akoe poen boekannja orang jang pengetjoet dan takoet mati, tjoema boewat samentara waktoe kita poenja oeroesan ditoenda doeloe, nanti kita oendang orang-orang dari kadoewa fihak bersama orang-orang pertengahan, itoe waktoe lantas kita bisa pastiken fihak mana jang bener dan fihak mana jang sala, sateroesnja bisa ditetepken hoekoeman pada fihak jang bersala."

„See Losoe, akoe minta kaoe toetoep moeloet,” kata Tam Swat Yong, „tida perdoeli kaoe mengalah sampe di mana djoega, akoe tida bisa trima, kaloe ini malem akoe tida bisa pastiken siapa jang binasa, tentoe sekali akoe tida nanti kaloewar dari ini fabriek Hin-liong. Maka akoe harep kaoe djoega kaloewarken kaoe poenja sendjata.”

See Tjong Pin taoe Tan Swat Yong poenja niatan soeda pasti, hingga tida ada goenanja ia memboedjoekin lebih djaoe dengen omongan lemes. Tjoema sadja lantaran ia soeda boenoeh mati soewaminja, tida bisa tida mengalah doeloe.

„Dari sebab Kim Toa Naynay teroes meneroes mendesek padakoe,” kata ia, „terpaksa akoe moesti menoeroetin kaoe poenja prentah. Sedeng kaloe kaoe poenja pedang bisa ambil djiwanja See Tjong Pin, itoelah ada paling baek dan tida banjak oeroesan lagi. Kim Toa Naynay, kaoe boleh moelai doeloe.”

„Kaoe pandang akoe Tam Swat Yong orang matjem apa?” berseroeh itoe djago betina dengen beengis. „Kaloe sadja kaoe sengadja mengalah padakoe, itoelah artinja kaoe tida pandang sabelah mata pada-koe, lebih heibat dari pada kaoe maki padakoe. Kaoe tida lantas tjaboet kaoe poenja sendjata maoe toeng-goe apa lagi?”

„Akoe menoeroet kaoe poenja prentah,” kata Ngo-in-pang-djit See Tjong Pin.

Sembari berkata begitoe ia merogo pinggangnya, dari mana ia tjaboet kaloewar iapoenja sendjata song-thauw-so-tjoe-tjhio.

„Itoe baroe bener dan pandang mata padakoe,” kata Tam Swat Yong sembari poeterken pedangnya di depan dadanja, kamoedian diangkat ka’atas dengen rata, sedeng tangan kirinja dirangkepin ka djoeroesan pedang dengen tipoe tiauw-thian-it-tjoe-hio ia memberi hormat pada lawanannya.

Di laen fihak Ngo-in-pang-djit See Tjong Pin moendoer ka blakang sembari gerakin iapoenja sendjata song-thauw-so-tjoe-tjhio, lebih doeloe membales hormat kamoedian pasang koeda-koeda menenggoe lawanannya poenja gerakan.

Tjie-hiong-piao Tam Swat Yong ini malem ber-tempoer dengen terboeroe-boeroe, sama sekali tida menggerakin doeloe badan boewat bikin lemes oerat, sembari lompat ka blakang ia goenaken tipoe-tipoe sian-djin-tjie-louw, oedjoeng pedangnya menoesoek ka djoeroesan dadanja See Tjong Pin, gerakannja sanget tjebet dan idoep, kerna ia dapet pengadjaran dari ajahnja hingga boekan sembarang, tambahan satelah ia menikah sama Kie-boen-kiam Kim Boen Kiem, sang soewami adjarin ia ilmoe silat pedang kie-boen-sip-sam-kiam, tjoema sajang ada satoe tja-tjat, jalih koerang tenaga jang berisi, inilah ada satoe tja-tjat jang tida bisa diperbaekin dengen te-

naga manoesia. Satoe kali bertaroeng atawa lebih betoel Tam Swat Yong jang menjerang, See Tjong Pin tida maoe membales menjerang, ia melaenken angkat ka'atas tangan kanannja dan tangan kirinja digerakin ka lamboeng kiri, hingga iapoenna sendjata song-thouw-so-tjoe-tjhio melindoengin iapoenna dada, berbareng dengen itoe ia berlompat moendoer ka blakang boewat kasi liwat itoe toesoekan pedang; tetapi ia tida membales menjerang. Tjoema sadja Tjie-hiong-piao jang berniat membales sakit hati soewaminja, sama sekali tida maoe kasi hati padanja.

Tatkala Tam Swat Yong menoesoek angin, badan-nya lantas dipoeoter, sedeng kaki kirinja dimadjoeken ka depan, berbareng dengen itoe, pedangnya soeda ditarik poelang; aken tetapi iapoenna kadoewa tangan terpisa dan itoe pedang soeda madjoe lagi ka depan, sekarang menjabet pada See Tjong Pin poenja iga kanan, sabetoelnja See Tjong Pin boleh membales menjerang sama iapoenna sendjata song-thauw-so-tjoe-tjhio, tetapi ia tida berboewat begitoe hanja kaki kirinja diserodotken ka depan sedeng badannja dipoeoter ka kiri, hingga seantero badannja berpoeter seperti angin poejoeh, hingga Tam Swat Yong poenja pedang kombali menjabet angin; tetapi di-ikoetin sama gerakan kaki kanannja diangkat ka depan dan madjoe satoe tindak ka sabelah kiri, dengen tipoe kim-tjiam-tam-hay pedangnya ditoesoekin ka paha blakangnya See Tjong Pin. Beroentoen soeda tiga kali diserang See Tjong Pin tida menangkis dari djoega tida membales menjerang; tetapi ternjata serangannya Tam Swat Yong ada berbahaja hingga diam-diam ia djadi sanget kaget, maka dengen mendadak ia berlompat beberapa belas kaki tingginja, kamedian ia toeroen lagi ka moeka boemi di sabelah blakang. Itoe waktoe Tam Swat Yong soeda memboeroe sembari toesoekin pedangnya ka djoeroesan

blakang kepalanja See Tjong Pin.

„Kim Toa Naynay, ma'afken akoe berlakoe koe-rang adjar!” berseroeh See Tjong Pin sambil balikin badannja dengen tipoe yaiw-tjoe-hwan-sin, sedeng iapoenna sendjata song-thauw-so-tjoe-tjhio jang ma-si teroes dipegangin seperti bermoela dengen tida berubah, dengen mendadak digerakin ka depan boe-wat menangkis, Tam Swat Yong dengen tjebet tarik poelang pedangnya, See Tjong Pin berseroeh keras sambil hantemken iapoenna song-thauw-so-tjoe-tjhio dengen tangan kiri dan tangan kanannja, jang ma-megang laen oedjoeng tali dari itoe sendjata, dilepas-ken, dengen maksoed dilibetken ka djoeroesan Tam Swat Yong poenja pinggang. Oleh kerna sekarang See Tjong Pin membales menjerang, Tam Swat Yong dengen berlompat kelit itoe serangan, tinggi-nja kira-kira anem atawa toedjoe kaki, kamoëdian koetika ia berdiri lagi di moeka boemi, iapoenna kaki kiri di depan dan kaki kanan di blakang, dalem sikep satengah balikin badan, aken tetapi iapoenna pedang disodorken ka blakang. Ini ada ilmoe silatnja Kim-sie-souw Tam Tjoe Sian, sebab kaloe toeboe berlom-pat ka atas, kadoewa kaki tida mengindjek boemi, paling gampang diserang orang, maka itoe pedang jang ia pegang bikin pendjagahan terlebih doeloe.

Itoe waktoe Ngo-in-pang-djit See Tjong Pin soeda memboeroe, sedeng iapoenna sendjata so-tjoe-tjhio soeda digerakin ka atas ditimpaken ka djoeroesan poendaknja Tam Swat Yong dengen tipoe ouw-liong-tjhoet-tong, sendjata „lembek” bisa dige-rakin dengen rata ka depan, itoelah ada sematjem ilmoe kapandean jang haroes dikagoemken. Tam Swat Yong biar poen pedangnya diangsoerken kablakang, tetapi sendjatanja See Tjong Pin soeda menjamber ka deket poendaknja jang sabelah kanan, Tam Swat Yong lantas bongkokin badannja ka depan, berba-

reng dengen itoe pedangnya ditoeroenken ka sabelah bawah dengen tjeplet dibalikin lagi ka atas dengen tipoe pok-in-kian-djit, itoe pedang menahan See Tjong Pin poenja kepala toembak jang maoe menjamber iapoenna poendak. Kaloe goenaken ini tipoe boewat menangkis itoe sendjata „lembek”, paling takoet kaloe sendiri poenja sendjata kena terlibet, hingga sendiri poenja sendjata kena dirampas orang, kerna ini tipoe silat djalannja tjeplet dan berobahnja poen lekas sekali. Pada waktoe itoe pedang bertemoe dengen sendjatanja See Tjong Pin, ternjata betoel sadja See Tjong Pin libet Tam Swat Yong poenja pedang dan dengen mendadak disentak ka blakang; tjoema sadja Tam Swat Yong tida maoe bikin dirinja tida bersendjata sabisanja ia pegang keras gagang pedangnya soepaja djangan terlepas.

Ngo-in-pang-djit See Tjong Pin itoe waktoe tida berhasil bikin Tam Swat Yong djadi tida bersendjata, tetapi iapoenna sendjata soeda balik lagi dihantemken pada Tam Swat Yong poenja poendak sabelah bawah berikoet lengen bagian jang sabelah atas, tjoema sadja Tam Swat Yong poen soeda bersedia dan laloe moendoer ka blakang boewat kasi liwat itoe sendjata jang menjamber.

Itoe waktoe bebrapa banjak penggawe fabriek soeda kaloewar dari masing-masing kamarnja boewat menjaksiken itoe pertandingan, di antaranja jang soeka sama kaonaran hatinja djadi girang, tetapi jang berpikiran pandjang, anggep ini oeroesan masih belon tamat dan banjak sekali boentoet-boentoetnya, biar poen See Tjong Pin poenja ilmoe silat djempolan, belon tentoe ia bisa ladenin satoe per satoe terhadep orang-orang jang membela di fihaknya Kim Boen Kiem; seperti sekarang ini orang prampoewan (tetapi marika tida taoe istrinja Kim Boen Kiem almarhoeem dan poetrinja Tjoe-bo-kim-so Tam Tjoe

Sian jang termashoer), sekali poen kaliasannja boekan tandingannja See Tjong Pin, tetapi kaloe orang prampoewan brani madjoe bikin pembalesan, See Tjong Pin tida nanti bisa enak tidoer.

Memang kaloe maoe dibilitjaraken ilmoe silatnya Tam Swat Yong boekan tandingannja See Tjong Pin, tjoema ia sanget takoet sama pembalesan dari itoe prampoewan poenja ajah, hingga ia bertanding dengen satengah hati. Djaga sadja diri djangan sampe kena dibinasaken, sabaliknya ia tida maoe membinasaken pada sang lawanan.

„See Losoe, djangan berlakoe kasian padanja!” berseroeh sala-satoe penggawe toekang bikin onar. „Babat roempoet moesti sama akar-akarnja baroe tida ada bahaja di laen hari!”

See Tjong Pin sembari bertempoer sembari menggroetoe koetika mendenger itoe oetjapan jang tida bertanggoeng djawab.

„Loe ngomong sendiri memang enak!” kata ia dengen soewara tida terang. Tetapi apa kaoe taoe akoe bisa hadepken satoe bahaja kamatiyan?”

Sabagimana di atas soeda dibilang, kaloe maoe bittjaraken ilmoe kapandean silat, Tam Swat Yong boekan tandingannja See Tjong Pin, tambahan tenaga koerang, tjoema lantaran ià soeda anggep dirinja mati, hingga menjerang dengen seroeh, di laen fihak See Tjong Pin merasa takoet pembalesan ajahnja kaloe ia boenoeh mati lagi Tam Swat Yong, jang ia soeda boenoeh soewaminja, maka pertandingan soeda bisa berdjalanan kira-kira doewapoeloe djoeroes lebih, tetapi Tjie-hiong-piao Tam Swat Yong rasaken soeda moelai tjape, laloe ia goenaken satoe tipoe tjiti-li-tauw-so menoeseok ka djoeroesan See Tjong Pin poenja blakang. Ini toesoekan gerakannja sanget tjeplet dan memake tenaga sakoewatnja, hingga itoe waktoe soeda deket di blakangnya See Tjong Pin,

kaloe sadja oedjoengnja pedang sampe, tangannja Tam Swat Yong jang menjekel pedang, satelah ditoesoekin ka dalem lantas dibalikin sembari ditjongkelken ka loewar, tida ampoen lagi djiwanja See Tjong Pin aken melajang ka acherat.

Itoe waktoe Ngo-in-pang-djit See Tjong Pin djoestroe lagi memblakangin pada lawanannya, sinar mengkredepnja itoe pedang dari sang lawanan soeda deket sekali, koenjoeng-koenjoeng ia hantemken iapoena song-thauw-so-tjoe-tjhio sembari membongkokin badan dan dipoeterken ka depan, ternjata itoe sendjata jang memake tali membentoer pada pedangnya Tam Swat Yong, lantaran iapoena tenaga koe-rang koewat, tangannja jang menjekel gagang pedang djadi kendor sedikit; tetapi Tjie-hiong-piao Tam Swat Yong pegang keras gagang pedangnya soepaja djangan terlepas, berbareng dengen itoe ia poeter badannja ka sabelah kanan, tetapi iapoena pedang tida bisa ditarik poelang, kerna masih terhalang oleh lawanannya poenja sendjata song-thauw-so-tjoe-tjhio. Satelah kakinja mengindjek boemi, ia bisa djoega tarik poelang pedangnya dan berlompat moendoer ka blakang.

See Tjong Pin djoega memboeroe sambil saram-pangken iapoena sendjata jang memake tali, tetapi tida memake tenaga penoeh, kerna ia tida bermaksoed binasaken pada Tam Swat Yong. Ia pikir maoe meloekaken sadja pada Tam Swat Yong, soepaja ia taoe maksoednja membales sakit hati soewaminja tida bisa kasampean, lantas moendoer dan tida menjerang padanja lebih djaoeh. Itoe waktoe dengen mendadak Tjie-hiong-piao Tam Swat Yong balikin badannja, kaliatan tangan kirinja digerakin, ternjata ia malepaskken iapoena sendjata resia tjie-hiong-piao, ini matjem sendjata resia berbeda djaoe sekali dengan piao jang kabanjakan, di waktoe dilepaskan se-

lamanja dari tempat deket dan dengen tida terdoega, hingga tenaganja ada sanget antep, biar poen Tam Swat Yong tida mempoenjai tenaga besar, dan makanja diseboet tjie-hiong-piao atawa piao lelaki dan prampoewan, jang lebih berat diseboet hiong-piao atawa jang bersifat lelaki, sedeng jang lebih enteng dinamaken tjie-piao atawa piao jang bersifat prampoewan. Tjaranja malepasken ada begitoe mendadak, hingga Ngo-in-pang-djit See Tjong Pin jang soeda kawakan di kalangan kang-ouw lebih doeloe sama sekali tida mendoega; itoe piao sekali poen dilepaskan dengen berbareng, tetapi jang satoe menjerang pada See Tjong Pin poenja iga kanan, jang laennja ka djoeroesan iga kiri, tatkala ia mendapet taoe lawanannya malepasken sendjata resia, soeda terlaloe kasep, kerna sabagimana di atas soeda dibilang, Tam Swat Yong sabegitoe berbalik lantas malepasken iapoena tjie-hiong-piao sama iapoena tangan kiri, ini hal lebih doeloe tida disangka oleh See Tjong Pin jang soeda berhadepan lebih dari saratoes lawanan, kerna Tam Swat Yong poenja tangan kanan jang mamegang pedang tinggal tetep tida berubah, maka ia sama sekali tida menjaga.

Tam Swat Yong kaloewarken iapoena piao pada sabelonnja iapoena kaki mengindjek boemi, dan terroes digenggem dalem tangannja, sabegitoe lekas ia berbalik lantas dilepaskan dengen tangan kiri, jang mengeloewarken itoe piao dari kantongnya, biar poen pada waktoe See Tjong Pin mendoesin dirinja dalem bahaja, tetapi iapoena song-thauw-so-tjoe-tjhio soeda ditimpaken ka depan, hingga soeda tida kaberoe kaloe maoe digoenaken boewat menangkis, dengen apa boleh boewat ia miringken badannja ka kanan, kamoedian ia tengkoeroep ka moeka boemi, tjoema itoe piao jang menjerang iapoena iga kiri dengen meleset meloekaken iapoena koelit dan daging.

„Bagoes!” berseroeh ia sambil berlompat bangoen dan teroes merat ka djoeroesan selatan.

„Tam Swat Yong! kaoe poenja tjie-hiong-piao sasoenggoenja bagoes sekali!” berseroeh ia sambil merat teroes.

Tam Swat Yong itoe waktoe pindaken pedangnya ka dalem tangan kiri, ia liat See Tjong Pin sekali poen soeda kena iapoenja piao masih bisa berlompat bangoen, dalem hatinya djadi sanget kaget tertjampoer dengan pengrasahan gemes, kerna ia taoe lawanannya mendapat loeka tida terlaloe heibat, soeda tentoe sadja ia 'mkamgoan dan mengedjer dari blakang.

„Tam Swat Yong, kaloe kaoe mendesek katerlaloean, terpaksa akoe moesti ambil djalan pendek, dengan tida ambil perdoeli segala apa,” berseroeh See Tjong Pin jang dikedjer, „apa kaoe kira akoe takoet padamoe?”

„Kita orang poenja permoesoohan ada terlaloe besar dan tida bisa idoep sama-sama di dalem ini doenia!” kata Tam Swat Yong sambil kretek gigi. „Boewat sekarang tida perlue kaoe banjak bitjara lagi.”

Ngo-in-pang-djit lantas berlompat ka depan dari menoedjoe ka atas gentengnya roemah samping timoer, Tam Swat Yong sambil kretek gigi teroes mengoeber sekali poen ia soeda taoe See Tjong Pin poenja liap-hoen-teng ada sanget berbahaja.

Itoe waktoe Ngo-in-pang-djit liap-hoen-teng See Tjong Pin soeda meliwinthin woewoengan dan sampe di atas gentengnya emper blakang, sedeng Tjie-hiong-piao Tam Swat Yong memang maoein djiwanja See Tjong Pin boewat membales kamatiannja iapoenja soewami, Kie-boen-kiam Kim Boen Kiem, maka lebih siang ia soeda ambil doewa piao dalem tangannja, tida perdoeli bagimana djoega, ia berniat malepaskan itoe doewa piao ka djoeroesan bagian

badannja sang lawanan jang bisa membawa kamatian; tetapi baroe sadja ia bergerak boewat melepasken itoe doewa piao, di atas genteng emper blakang soeda kadengeran See Tjong Pin berseroeh.

„Tam Swat Yong! kaoe mentjari mati sendiri dan boekan akoe poenja sala!” kata ia sambil menggerakin tangan kanannya.

Berbareng dengen itoe, tertampak anem benda jang mengkilap dan mengkredep seperti bintang menjamber ka djoeroesan Tam Swat Yong; aken tetapi Tam Swat Yong poenja doewa piao poen soeda dilepaskan, hingga bagian atas jang menjamber ka djoeroesan dada dan peroet semoewa kena dibikin antjoer oleh Tam Swat Yong poenja doewa piao. Sedeng doewa liap-hoen-teng jang ditoedjoeken pada Tam Swat Yong poenja bagian tengah, lantaran See Tjong Pin poenja dada kanan soeda mendapat loeka katimpa satoe piaonja Tam Swat Yong, tangannya tida bisa digerakin dengen laloewasa, hingga ia djoedjoe terlaloe rendah dan mengenaken woewoengan roemah, sedeng doewa lagi jang ditoedjoeken ka bagian bawah, pasti sadja tjoema melanggar genteng di sabelah bawahnja woewoengan. Tjoema sadja sala-satoe liap-hoen-teng jang mengenaken woewoengan lantaran mengenakkenna woewoengan tida banjak, telah meledjit dan menjamber ka djoeroesan peroetnja Tam Swat Yong, biar poen ia memboewang diri ka atas genteng, tida oeroeng mengenaken iapoenna poendak kanan, rasanja begitoe sakit dan ampir sadja ia djato ka bawah. Tetapi sabisanja ia tahan dan berlompat bangoen.

„Hei, orang she See!” berseroeh ia. „Kim Toa Naynay aken dateng lagi boewat kadoewa kalinja. Harep kaoe toenggoe sadja!”

„Harep sadja kaoe bisa dateng lagi,” saoet See

Tjong Pin, „agar djangan sampe mati akoe tida bisa merem.”

Tam Swat Yong rasaken poendaknja jang terkena liap-hoen-teng sanget sakit, tetapi ia kerasken hati berlaloe dari fabriek tenoen Hin-liong dengen memake djalan dari genteng roemah, satelah meliawatin Phoa-kee-kio, Tam Swat Yong rasaken loekanja tida bisa katahan lagi sakitnya, laloe ia berdoedoek di pinggir djalanan boewat mengaso, ia ambil kantong piao digigit di moeloetnja, soepaja bisa menahan pengrasahan sakit, dengen tabah ia tjaboet kaloewar itoe sendjata resia dari loekanja, satelah itoe pakoe ditjaboet kaloewar, darah dengen lantas mengalir kaloewar. Lebih doeloe ia taro itoe liap-hoen-teng di moeka boemi, kamoedian ngangnahken moeloetnja kaloewarken itoe kantong piao jang ia gigit, dengen satoe salampe ia bikin bresih darah jang mengalir kaloewar dari loekanja, kamoedian itoe loeka dibebelin obat boeboek peranti mengobatin loeka. Rasanja ada begitoe sakit, biar poen ia kretek gigi boewat menahan, tetapi badannja mengeloewarken kringet dingin. Beberapa kali ia maoe boenoeh diri, soepaja terlepas dari ini kasakitan hebat. Tjoema sadja ia tida tega meninggalken Siao Tiap jang tertjinta. Ia pikir taro kata moesti mati poen lebih baek di roemah sendiri. Maka ia pikir maoe poelang doeloe ka roemah boewat bertemoe satoe kali lagi sama anaknya jang tertjinta.

Ia poengoet itoe sendjata resia — liap-hoen-teng jang meloekaken padanja, dan simpel dalem iapoenna kantong piao, kamoedian ambil iapoenna pedang, paksaken diri boewat berbangkit, tjoema sadja iapoenna tangan kanan soeda tida bisa digoenaaken, kerna kaloe digerakin rasanja sanget sakit, saban kali ia bertindak saban kali loekanja merasa sanget sakit. Inilah ada keadahan sanget hebat, pertama

itoe waktoe soeda djaoeh malem, kadoewa ia mendapet loeka jang tida enteng, tetapi moesti berdjalan begitoe djaoeh, maka ia liwatin Song-sie-kee dan sampe di Thung-kee-lang, perloe memake tempo doewa djam lebih. Tatkala ia maoe berlompat ka atas genteng, sabagimana pada waktoe ia brangkat dari roemah, ternjata ia soeda tida ada itoe kamam-poean lagi, terpaksa ia mengetok pintoe dengen goenaken pedangnya.

Kim Ong sedari madjikan prampoewannja brangkat pergi, tida berbeda seperti ajam jang maoe bertelor, masoek sala, kaloewar tida bener, doedoek tida enak djalan poen tida karoewan rasanja. Beroelang-oelang ia melongok ka roemah blakang, maoe liat apa sang madjikan prampoewan soeda balik poelang atawa belon. Tengah malem soeda liwat, tetapi sang madjikan prampoewan masih belon djoega balik poelang; beroentoeng Siao Tiap tidoer dengen njenjak, tida mendoesin mentjari iboenja. Tinggal Kim Ong berdoewa sama baboe, iaorang bingoeng dan goegoep tida taoe apa jang moesti diperboewat, sedeng itoe baboe lantaran anggep madjikan prampoewan pergi mentjari moesoh jang binasaken madjikan lelakinya, banjakan tjlakanja dari pada selamatnja, maka teroes meneroes ia koetjoerken aer mata terlebih lagi pada sasoedanja liwat tengah malem, sang madjikan prampoewan masih belon kaliatan poelang djoega. Itoe baboe bernjali ketjil, roemah begitoe besar, itoe waktoe tjoema tinggal ia bersama Siao Tiap jang soeda tidoer, sang madjikan prampoewan tida ada, sedeng Kim Ong berdiem di loewar, tambahan di pertengahan roemah ada dikoeboer maitnja sang madjikan lelaki, iapoenna pengrasahan takoet djadi bertambah, maka pada waktoe Kim Ong masoek ia tida kasiken itoe boedjang toewa jang setia pergi kaloewar lagi. Satelah berselang sakoetika

lamanja, Kim Ong merasa koewatir kaloe ada orang ketok pintoe, kaloe ia berdiam di blakang, tentoe tida bisa kadengeran djika ada orang ketok pintoe.

„Kaoe djangan katakoetan,” kata ia pada itoe baboe, „takoet tida ada goenanja! Kaloe menoeroet akoe poenja pemandangan, madjikan prampoewan pergi ka fabriek tenoen Hin-liong, banjakan tjilakanja dari pada selamat, sekarang akoe maoe pergi ka sana boewat mendapet taoe keadahan jang sabener-nja, apabila soeda bisa dapet taoe keadahan sabetoel-nja, akoe bisa lega pikiran, djangan seperti sekarang bisa bikin orang djadi iboek dan poesing satengah mati; apabila tjilakanja bener-bener ia soeda binasa di tangannja moesoeh, akoe poen bisa rawat iapoenna mait, madjikan prampoewan idoepnja begitoe poenja keras adat-tabeatnja, pada sasoedanja ia mati tida boleh diperlakoeken sembarang oleh laen orang.”

Sahabisnja berkata begitoe, Kim Ong lantas pergi ka loewar dengan tersipoe-sipoe, kabetoelan sasampe-nja di loewar ia dapet denger ada orang ketok pintoe dengen barang keras dan antep. Itoe waktoe Kim Ong soeda nekat dan tida seperti biasanja penakoet.

„Kaoe orang tida perloe menggedor pintoe!” berseroeh ia. „Di sini masih ada doewa satengah djiwa, apa ini djoega kaoe orang maoe binasaken sekalian?”

„Kim Ong kaoe djangan mengatjo-belo, ini akoe jang poelang!” kata satoe soewara prampoewan dari sabelah loewar.

Kim Ong djadi sanget girang, sebab ia kenalin soewara orang jang mengetok pintoe, boekan laen dari iapoenna madjikan prampoewan, dengen tida merasa ia berseroeh sabagi orang jang bersoerak, boeroe-boeroe ia boekaken pintoe dengen terpentang lebar. Itoe waktoe Tam Swat Yong dengen limboeng ma-soek ka dalem.

„Toa Naynay, kaoe kenapa sempojongan?” menanya Kim Ong dengan penoeh kakoewatiran.

Tetapi Tam Swat Yong tida mendjawab, hanja bertindak masoek ka dalem dengen tjepet. Kim Ong boeroe-boeroe toetoep lagi pintoe dan mengikoetin madjikan prampoewannja masoek ka dalem. Tam Swat Yong masoek ka dalem dan teroes ka dalem kamar sendiri, sasampenja ia lemparken pedangnja dan boewang diri ka atas pembarangan, bisa dibilang ampir dalem sa’at itoe djoega ia djadi pangsan. Itoe waktoe Kim Ong mengikoetin masoek ka dalem kamar. Itoe waktoe djoega lantas dipasang doewa lilin soepaja keadahan dalem kamar djadi lebih terang. Oleh kerna kaliatannja sang madjikan prampoewan keadahannja berbahaja, Kim Ong tida pikir lagi adat kabiasahan. Itoe baboe ambil sala-satoe tempat lilin jang baroe dipasang, ia bawa itoe lilin dibowet menjeloehin moekanja sang madjikan prampoewan, jang ia awasin dengen terliti sakoetika lamanja, itoe tempat lilin jang ia lagi pegang djadi bergerak-gerak, sebab tangannja goemeteran. Achir-nja itoe tempat lilin terlepas dari tangannja dan djato ka atas djoebin, berbareng dengen itoe ia menangis menggeroeng-geroeng.

Kim Ong hatinja mentjelos, sebab ia doega tentoe sang madjikan prampoewan dapet tjilaka; aken tetapi ia maoe liat dengen mata sendiri, sabetoelnja sang madjikan prampoewan keadahannja bagimana. Ia poengoet itoe tempat lilin dan dipasang lagi. Dengan panerangan lilin ia soeloei moeka dan toeboenja sang madjikan prampoewan, ternjata paras moekanja sanget poetjet dan tida ada barang sedikit warna darah, sedeng di poendak kanannja penoeh sama noda darah. Roepanja sang madjikan prampoewan soeda mendapet loeka jang tida bisa dikata enteng. Itoe waktoe sang baboe tida brentinja me-

manggil-manggil pada sang madjikan prampoewan, hingga Siao Tiap poen djadi mendoesin lantaran soewara riboet-riboet. Koetika meliat keadahan sang iboe begitoe roepa, laloe ia bangoen menjamperin, dengen mendekém di pinggir sang iboe dan mamegangin tangannja, ia menangis keras dan tiada breninja memanggil-manggil sang iboe sembari mewek.

Lama djoega Tam Swat Yong djadi sedar dari pangsannya, tjoema sadja keadahannja sanget lemah. Itoe waktoe ia melekin kadoewa matanja dan meliat-liat ka depan, lantaran tangannja dipegangin oleh sang anak, ia tida bisa gerakin tangannja, tetapi ia poenja pikiran terang dan itoe waktoe ia bitjara pada sang baboe.

„Kaoe orang djangan takoet!” kata ia dengen soewara serak dan sember. „Akoe tida nanti aken mati, biar poen akoe mendapat loeka berat. Roepannya lantaran akoe soeda berdjalan sanget djaoeh, telah kahilangan banjak darah, maka sekarang rasa-nja sanget lemes dan baroesan bisa djadi akoe telah pangsan, kerna badankoe sanget lemah. Boewat sekarang paling perloe akoe moesti mengaso, maka Siao Tiap moesti diboedjoekin soepaja berlaloe dari sini.....”

Berkata sampe di sini ia tjelingoekan dengen gerakan lemah, ia dapet liat pada Kim Ong jang di moekanja penoeh dengen tanda-tanda bekas aer mata, berdiri di pinggir pembaringan dengen mamegangin tempat lilin jang lilinnja menjala.

„Kim Ong kaoe ka sini,” kata Tam Swat Yong dengen soewara lemah.

„Toa Naynay, kaoe poenja loeka bagimana?” menanja Kim Ong dengen soewara sasenggoekan. „Harrep kaoe soeka bitjara dengen sabernernja.”

Tam Swat Yong poen mengeloewarken aer mata.

„Kim Ong, djangan takoet,” saoet sang madjikan

prampoewan, „akoe tida djoestaken kaoe. Akoe poenja keadahan tida terlaloe berbahaja dan tida nanti bisa mati. Makanja kaliatan sanget pajah, lantaran terlaloe tjape dan kahilangan banjak darah; tetapi akoe poenja toeboeh sampe koewat boewat menahan semoewa kasengsarahan, kaoe tida perloe koewatir. Lagian akoe tida maoe mati, sebab akoe belon bisa bales kamatiannja Toaya. See Tjong Pin soeda goenaken lagi iapoenna sendjata resia jang berbahaja — liap-hoen-teng; tetapi lantaran ia soeda dilokaken oleh akoe poenja sala-satoe piao, ia tida bisa malepaskan itoe sendjata resia berbahaja dengan telak, inilah sebabnya akoe bisa balik poelang dengan bernjawa. Akoe dapet loeka di poendak kanan dan tida aken membahajaken djiwakoe. Sekarang akoe rasa-nja sanget aoes, tjoba antjoerin goela doewa mangkok, boewat akoe minoem.”

„Apa kaoe minoem aer goela baek?”

„Hajo, lekasan pergi antjoerin itoe goela, kaoe tida mengerti; akoe lantaran terlaloe banjak mengalirken darah dan terlaloe lelah, kaloe minoem itoe aer goela bisa menambah kakoewatan dan djoega bisa bikin anteng akoe poenja djantoeng jang bakerdja terlaloe keras.”

Kim Ong dengan tida banjak bitjara lagi lantas pergi ka dapoer masak aer panas, satelah berdidih lantas antjoerin doewa mangkok aer goela, kamoe-dian ia bawa masoek ka dalem kamar. Ternjata Tam Swat Yong satelah minoem itoe aer goela keadahan-nya rada mendingan. Ia soeroe itoe baboe angkat ia bangoen berdoedoek di pembaringan, dengan pelahan ia minoem itoe doewa mangkok aer goela sampe abis.

Menoeroet ilmoe pengobatan Tionghoa, kaloe sa-orang mendapet loeka dan kaloewar banjak darah, tida kaboberoe dapetken obat dan sinshe jang bisa mengasi nasehat moesti makan obat apa, minoem aer

goela anget ada soeatoe tjara jang sanget baek boewat membuat koewat badan dalem itoe sa'at jang berbahaja. Tam Swat Yong dapat pengadjaran dari sang ajah jang banjak pengalamannja, maka satelah minoem aer goela dan mengaso sakoetika lamanja, Tam Swat Yong tida begitoe lemah lagi seperti bermoela, laloe ia panggil Kim Ong dateng deket ka pembaringannja. Itoe waktoe baboe soeda bisa boedjoekin Siao Tiap pergi tidoer lagi. Tam Swat Yong lantas toetoerken dengen ringkes apa jang telah terjadi pada Kim Ong dan itoe baboe, kerna Siao Tiap soeda tidoer lagi. Kamoedian ia pesen pada Kim Ong, nanti kaloe langit soeda terang, salekasnja ia bawa satoe soerat recept boewat membeli obat, sebab ia paham ilmoe mengobatin prihal loeka-loeka, hingga tida perloe minta pertoeloengannja sinshe (thabib). Salaennja itoe, ia kasi mengarti djoega pada Kim Ong, tida perloe berkoewatir, sebab iapoенja loeka tida berbahaja bagi djiwanja, salaennja itoe ia Tam Swat Yong) tida nanti aken soeroe Kim Ong poelang, seperti doeloean ia soeda berboewat, sebab sekarang keadahan soeda berobah, hingga tida perloe lagi soeroe Kim Ong poelang ka kampoengnja.

„Nanti pada sasoedahnja akoe poenja loeka soeda mendjadi baek,” kata sang madjikan prampoewan pada itoe boedjang setia, dengen membawa Siao Tiap akoe aken brangkat pergi ka Houw-gee-san Tjip-sian-tjhung, boewat minta pertoeloengannja akoe poenja ajah soepaja ia balesken itoe sakit hati atas kabinasahannja Toaya. Sekarang pada sasoedanja akoe mengadoe djiwa sama See Tjong Pin dan djiwakoe tida binasa, sabagi gantinja tjoema mendapat ini loeka jang tida terlaloe berat, akoe bisa katemoeken ajahkoe dengen moeka terang. Salaennja itoe, orang bisa hargaken poetrinja Tam Tjoe Sian dan istrinjja Kim Boen Kiem boekannja boleh diboewat semba-

rangan!"

Kim Ong poenja kakoewatiran sekarang soeda ilang saparonja, laloe ia pesen pada baboe soepaja meladenin pada Tao Naynay dengen betoel, sebab ia maoe pergi kaloewar. Pada waktoe langit soeda moelai terang, Tam Swat Yong soeroe baboe ambil iapoenja koempoelan soerat-soerat jang berada di dalem lemari, kamoedian ia pilih satoe antaranja dan panggil Kim Ong, soeroe ia pergi beli di roemah obat. Itoe obat sama sekali ada anembelas matjem, jang semoewanja moesti digiling mendjadi boeboek ; tetapi itoe anembelas matjem obat satelah digiling mendjadi boeboek, tida boleh ditjampoer adoek mendjadi satoe, hanja saban roepanja haroes diboengkoes dengen terpisa sendiri-diri. Kim Ong satelah menerima itoe pesenan lantas pergi beli ka roemah obat dengen salekasnya.

Satelah Kim Ong soeda dapet beli obat, dengen tjetpet lantas ia poelang ka roemah dan kasihken 16 boengkoesan itoe pada iapoenja madjikan prampoewan. Tam Swat Yong pilih sendiri dan boewang apa jang tida perloe dipake. Inilah mendjaga agar djangnan sampe resia recept obat ini diketahoei oleh laen orang ; kamoedian ia beberken itoe obat di loekanja. Begitoelah Tam Swat Yong dengen sabar menoeng-goe semboehrja iapoenja loeka, dan ternjata iapoenja kasehatan sehari dengen sehari bertambah baek. Se-soeda liwat doewa poeloeh hari lebih ia poen soeda moelain bisa bergerak seperti biasa lagi.

Pada satoe hari sasoeda ia merasa badannja soeda koewat betoel, lantas ia boengkoes sedikit pakean, dan kamoedian ia panggil Kim Ong dan baboenja Siao Tiap-dji, bilang : „Kim Ong, ini hari akoe dengen Siaoya hendak brangkat pergi ka Houw-gees-san Tjip-sian-tjhung boewat minta pertoeloengannja akoe poenja ajah. Kaoe berdoewa jang soeda ambil

katetepan tida maoe pergi dari ini roemah, maka itoe akoe minta kaoe orang soeka djaga ini roemah baek-baek dan salekasnya bisa akoe poen aken kombali. Moga-mogahan kita bisa lekas bertemoe dengan selamet."

Kim Ong dan baboe mengarti bahwa mareka tida bisa menjegah kamaoean madjikan prampoewannja, maka mareka tjoema bisa oetjapken padanja soepaja berhati-hati di tengah djalan dan bisa poelang dengan tida koerang soewatoo apa-apa.

Tam Swat Yong sasoeda pasang hio di depan aboe soewaminja kamoedian ia dengen Siao Tiap-dji brangkat dari kota Yangtjoe menoedjoe ka Ouwpak. Oleh kerna ia baroe semboeh dari sakitnya jang berat itoe dan kakoewatan badannya belon kombali lagi sapenoehnya, tertambah lagi, di sepandjang perdjalanan hawa oedara ada amat djelek dan ampir saban hari tida brenti-brentinja toeroen oedjan. Dari itoe hingga di pertengahan Djie-gwee baroelah matrika bisa sampe di Houw-gee-san. Sabagimana seperti pembatja tentoe belon loepa jang di permoolaan tjerita ini ada terloekis satoe prampoewan moeda dengan satoe anak tanggoeng menoenggang doewa ekor kalde, pada satoe pagi waktoe baroe sadja terang tanah, dengan pelahan berdjalan menoedjoe ka Tjis-sian-tjhung.

Tam Swat Yong sambil menoendjoek ka depan dan seraja bilang pada Siao Tiap-dji, „kaoe liat itoe-lah ada goenoeng Hwee-in-nia dan Tjis-sian-tjhung berarti soeda sampe di depan mata kita. Kaoe haroes berhati-hati djangan nakal dan kabanjakan omong. Kita orang sekarang soeda tida poenja roemah lagi boeat poelang, dan dateng kasini boeat minta per-toeloengan pada kaoe poenja 'nkong loear oentoek membales sakit hati ajahmoe." „Iboe, kaoe djangan slempang," mendjawab Siao

Tiap-dji dengen lantas, „Biarpoen oemoerkoe masih moeda, akoe poen mengarti bahwa ajahkoe telah me-noetoep mata dengan setjara jang begitoe mengenes-ken, maka biar bagimanapoen akoe moesti bales sakit hati itoe.”

Seraja marika landjoetken perdjalananja dengan sembari mengobrol, tida terasa marika telah sampe di moeka kampoeng Tjip-sian-tjhung.

Tjip-sian-tjhung terletak di bawah kaki goenoeng Hwee-in-nia, pemandangan di sapoeterija ada sanget permei dan indah, kabetoelan itoe koetika soeda ampir sampe di bagian pengabisan dari moesim semi (Tjoen), maka djoega segala boengah-boengah dan poehcen-poehoen selagi berada dalem keadahan jang sedeng soeboernja; tida heran djikaloe itoe soeda menambahken kaeilokannja pemandangan.

Tjip-sian-tjhung adalah satoe kampoeng jang tida sebrapa besar dan pendoedoeknja poen tjoema ada kira-kira doewapoeloeh atau tigapoeloeh roemah. Di antara roemah-roemah ini ada satoe jang paling besar; inilah ada roemah kapoenjahan Tjoe-bo-kim-so Tam Tjoe Sian. Roemah itoe ada terkoeroeng dengan pager bamboe, dan di loewarnja ini pager ada ditanemin penoeh dengan poehoen-poehoen yanglioë. Di bagian dalem dari pager banjak ditanemin poehoen-poehoen to jang sedeng mekar boengahnja. Di bagian depan ini pager ada berdiri satoe roemah ketjil jaitoe adalah roemahnja pendjaga pintoe Tam Hok. Kabetoelan koetika itoe Tam Hok sedeng maoe kaloewar; dari belakang pager itoe ia dapet liat Tjie-hiong-piao Tam Swat Yong dengan Siao Tiap-dji jang masing-masing menoentoen kaldenja mendatengin hendak masoek ka pintoe pager. Moela-moela ia tida kenalin siapa adanja, tetapi sasoeda ia liat dengen lebih terliti lantas ia lari kaloewar boewat menjamboet dan membri hormat seraja bilang, „Ko

Naynay, apa kaoe baroe sampe? Kenapa kita tida dapt kabar apa-apa terlebih doeloe tentang kada-tengan kaoe ini?" Sembari bitjara Tam Hok sembari tanggapir boengkoesannja kadoewa madjikan moeda itoe. Tetapi dari dandanan dan aer moekanja kadoewa orang ini menoendjoeken marika ada sanget lesoe dan sedih, dari itoelah telah menimboelken Tam Hok poenja pengrasahan jang amat heran. Menoe-roet iapoenna pengatahoean jang mertoeanja Ko Naynay ini berada di kota Yangtjioe dari familie Kim jang teritoeng ada satoe familie hartawan, djoega ia masi inget pada bebrapa taon jang telah laloe Ko Naynay poen soeda perna dateng, itoe koe-tika ia ada teranter dengen baboe dan boedjang-boedjang begitoe djoega membawa banjak barang-barang bingkisan. Tapi ini hari Ko Naynay soeda dateng dengen keadahan jang sademikian adanja. Inilah soeda menimboelken Tam Hok poenja pengrasahan sanget heran. Tam Hok adalah satoe boedjang jang tadjem pikirannja dan terliti, maka itoe ia poen tida brani mananjaken apa-apa, katjoewali itoe perasa-han heran jang timboel dalem hatinja.

Sasoeda ia trima itoe semoewa boengkoesan dan lantas toentoen itoe doewa ekor kalde sambil kaokin laen kawannja — Ah Hwat jang dengen lantas dateng menghamperin. Ah Hwat ada satoe boedjang jang belon bebrapa lama bekerdja di sitoe, maka ia tida taoe sedeng berhadepan dengen siapa dan ia tida ajal lagi lantas membriken hormatnja. Dan Tam Hok kasiken itoe doewa ekor kalde padanja boewat ditoentoen teroes ka kandangnja, sedeng ia poen lantas persilahkan kadoewa iboe dan anak masoek.

Begitoe lekas marika sampe di dalem roewangan roemah, Tam Swat Yong lantas tanja pada Tam Hok di mana iboenja berada dan apa Lo-tjhung-tjoe soeda bangoen atawa belon.

„Lo-tjhung-tjoe ada di kamar belakang lagi bersamedhi dan madjikan prampoewan selagi berada di kamar depan,” menjaoet Tam Hok.

„Akoe haroes katemoeken iboekoe doeloe,” berkata poela Tam Swat Yong sambil manggoet-manggoet seraja berdjalanan menoedjoe ka roewangan jang ditoenjoekin sedeng Siao Tiap-dji mengikoetin di belakangnya.

Sasoedah liwat bebrapa roewangan achirnja marika sampe di satoe tjimtjeh jang di sebelah oetaranja ada saderekan kamar-kamar. Tam Hok telah tjepe tin tindakannja dan mendoeloein kadepan pintoe dari salah satoe kamar. Sembari ia berbatoek bebrapa kali sambil menanja dan bilang, „Ah Kwie, apa kaoe ada di dalem?” Dari dalem kamar lantas terdenger soewaranja satoe anak prampoewan menjaoet dan ia lantas kaloewar; ternjata ia ada satoe boedak prampoewan jang baroe beroemoer kira-kira doewa atau tiga belas tahoen. Tam Hok lantas soerue ia kasi taoe pada madjikan prampoewan bahwa Ko Naynay dan poetranja soedah sampe dari Yangtjioe. Begitoe Ah Kwie masoek kadalem tida antara lama ia kaloewar kombali sambil mempersilahkan Tam Swat Yong berdoewa masoek, sedeng Tam Hok telah trimaken marika poenja semoewa boengkoesan pada Ah Kwie. Begitoe Tam Swat Yong soedah berada di dalem kamar ia dapet liat iboe tirinja sedeng doedoek di satoe korsi bamboe di pinggir tembok menghadepin satoe medja dan di atasnya soedah tersedia seperangkat pekakas thee dan satoe pendopahan jang sedeng mementjarken asepnia jang sangat haroem. Tjie-hiong-piao Tam Swat Yong menampak iboe tirinja berada dalem keadahan demikian, teringetlah ia kapada iboenja aseli jang soedah meninggal doenia, hingga dengen tida terasa ia telah koetjoerken aer matanja. Sasoedah ia djalan madjoe

kadepan bebrapa tindak laloe berloetoet di atas tanah memberi hormat seraja berkata, „Iboe, apakah iboe ada dalem keadahan baek? Anak soedah bebrapa tahoen tida dateng menengokin kaoe. Apa ajah poen ada dalem slamet?”

Seperti pembatja poen soedah taoe, bahwa Tjin Liong Tjeng ada istri Tjoe-bo-kim-so Tam Tjoe Sian jang kadoewa dan oemoernja poen ada terpaoet djaoe sekali. Di itoe tahoen Tam Tjoe Sian soedah beroemoer 67 tahoen tetapi istrinja baroe 40 tahoen lebih, maka terbanding dengen poetrinja — Tam Swat Yong tida beda seperti 'ntji ade.

Tjin Liong Tjeng meliat Tam Swat Yong memberi hormat ia lantas berbangkit dari tempat doedoeknya dan berkata, „Ko Naynay soedah sadjalah, danganan kaoe terlaloe banjak berbitjara,” tapi Tam Swat Yong malahan pegang tangannja Siao Tiap-dji seraja bilang padanja, „Tiap-dji, kasikenlah hormatmoe pada Ma loewar.”

Dengen tida ajal lagi Siao Tiap-dji poen djalanken hormatnja. Berbareng dengen itoe Tjin Liong Tjeng lantas tjekel lengennja Siao Tiap-dji sambil bilang, „Tiap-dji, kaoe soedah djadi begini besar, apakah masih inget pada kaoe poenja Ma-loewar?”

Siao Tiap-dji telah menoleh ka atas dan sesaat kamoedian ia manggoetin kapalanja seraja berkata: „Akoe masih inget dan kenalin pada Gwa'ma.”

Kamoedian Tjin Liong Tjeng telah doedoek kombalii ka tempatnja tadi dengen persilahkan Tam Swat Yong berdoedoek.

Soedah sedari tadi bermoela poen memang Tjin Liong Tjeng sanget perhatiken gerakannja serta tampangnja Tam Swat Yong, cleh kerna itoe maka ia lantas moelai pertanjaannja dan bilang:

„Ko Naynay, mengapatah kaoe begitoe poetjet serta koeroes? Djoega dalem perdjalananmoe jang

sakean djaoehnja mengapatah tida ada barang satoe orang jang toeroet manganter?"

„Iboe, soedah bebrapa tahoen telah liwat akoe tida ada tempo boeat dateng menengokin pada ajah dan iboe, tapi akoe poenja kadatengan jang mendadak ini dengen sanget menjesel akoe moesti mengatoerken jang akoe sasoenggoehnja ada membawa satoe warta jang sanget tida broentoeng," saoet Tam Swat Yong dengen tampang jang sedih.

Tjin Liong Tjeng djadi terprandjat dan lantas teroesken pertanjaannja: „Hal apatah jang tida broentoeng?"

„Soewamikoe telah meninggal doenia," menjaoet Tam Swat Yong.

Mendenger penjaoetan Tam Swat Yong, Tjin Liong Tjeng maskipoen ia ada djadi iboe kadoewa boekan sadja ia tida dapetken pengrasahan sedih dari itoe perkatahan tapi sebaliknya dengen doewa mata jang tadjem ia lirik kadoewa iboe dan anak itoe dari kaki sampe ka kapala, kerna Tjin Liong Tjeng berpikiran maskipoen tida bisa dibantah jang marika berdoewa pakeannja ada sanget saderhana dan terdiri dari badjoe-badjoe jang boekan baroe, tapi mengapatah tida ada barang sedikitpoen jang menandaken marika selagi berada dalem keadahan berka-boeng (Toahah). Djoestroe inilah jang membikin Tjin Liong Tjeng poenja amarah dan berkata: „Kaoe poenja soewami soedah meninggal bebrapa lama?"

„Belon tjoekoep seratoes hari, iboe," saoet Tam Swat Yong.

„Di antara kaoe bersoewami-istri apatah barang-kali telah lama ilang kaoe orang poenja katjintahan? Dan apatah moengkin djoega ini anak boekan darah dagingnya soewamimoe?" mendesek Tjin Liong Tjeng dengen roman jang lebih moerka.

Mendenger perkatahan iboe-tirinja jang sademi-

kian heibatnja; Tam Swat Yong telah djadi terprandjat; ia lantas berbangkit dari tempat doedoeknja, menghamperin kadepan iboenja dan sigra berloetoet di tanah sambil berkata: „Iboe, akoe moehoen kaoe djanganlah mendjadi moerka terlebih doeloe. Akoe adalah djadi poetrinja dari satoe familie Tam jg. telah kaloewar-pintoe; soedah tjoekoep akoe menerima pendidikan roemah-tangga, mengarti prihal adat-istiadat dan kabedjikan, dan di antara akoe bersoewami-istri poen senantiasa ada tjinta menjinta sangat kekel, maka dari itoe inilah ada poetranja soewamikoe jang sasoenggoehnja serta terlahir dari darah dagingnya soewamikoe jang aseli.”

„Akoe sekarang poen mengarti, iboe,” meneroesken Tam Swat Yong, „di dalem hati kaoe tentoe ada mendoegah bahwa soewamikoe telah meninggal doenia dan akoe soedah berboewat segala hal-hal jg. telah melanggar prikabedjikan dan kadjoedjoeran. Doegahan demikain poen ada beralesan, kerna di seloeroeh badankoe begitoepoen di badan anakkoe ini tida ada tertampak barang sedikit tanda jang menandaken kita selagi berada dalem berkaboeng dan kадатengankoe kasini adalah djadi terpandang tjoema oentoek menjerahken ini anak dan kamoedian aken teroes mentjari laen soewami lagi sadja. Apabila sampe akoe betoel-betoel telah berboewat hal-hal jang demikian di loewaran, apatah goenanja akoe moesti kombali lagi ka Houw-gee-san jang tentoe aken menerima orang poenja hinaan dan bikin bernoda nama toeroenan familie Tam.”

„Dengan sasoenggoehnja akoe moesti bilang,” meneroesken Tam Swat Yong, „sekarang kadatengankoe ini adalah oleh kerna boekan sadja ia soedah kailangan djiwa soewaminja dan djoega telah loedes roemah tangganja; sasoedah soewami-istri mendjadi terpetjah belah dan di kota Yangtjioe soedah tida

ada tempat lagi boewat akoe dan anakkoe berdiam. Inilah ada dari sebab desekan dari fihak moesoeh. Menginget akoe sekarang soedah tida ada laen djalan lagi, maka kapaksa akoe ambil katetepan boewat poelang ka Houw-gee-san, roemah-tangga ajah dan iboe, dengen mengharep sanget moehoen ajah dan iboe poenja petoendjoek-petoendjoek jang berharga.

Sasoedah oetjapken demikian, kamoedian Tam Swat Yong lantas totoerken satoe per satoe apa jang soedah kedjadian di antara peristiwa soewamijna dan Boen Lam Hin dan sampe achirnya ia meninggal di bawah sendjata resianja Ngo-in-pang-djit See Tjong Pin — Liap-hoen-teng.

Baroe sadja Tam Swat Yong tjeritaken sampe di sini Tjin Liong Tjeng lantas pegat omongan itoe dan bilang: „Ja, akoe sampe terang maksoed kada-tenganmoe ini. Sasoedah soewamimoe meninggal dan kaoe dengen membawa anakmoe dateng kasini boewat katemoeken ajahmoe jang penoeh dengen kasaktian oentoek minta toeloeng bikin pembalesan goena soewamimoe. Betoel atau bener, Ko Naynay? Tetapi bagimana dengen kepandean ilmoe silatmoe sendiri?”

„Kaoe belon denger sampe abis omongankoe, iboe,” saoet Tam Swat Yong, „manatah akoe bisa berboewat sampe sademikian pengetjoet? Akoe adalah Ko Naynay jang kaloewar menikah dari kaloewarga Tjip-sian-tjhung; akoe adalah gadisnya Tjoe-bo-kim-so Tam Lo-enghiong; apabila akoe bener-bener kom-bali dengen begitoe sadja sebagimana jang kaoe doe-gah, masatah ajah dan iboe bisa idzinken akoe dateng masoek lagi ka roemah ini?”

Pada itoe koetika, sasoedahnja akoe bikin beres pengoeboeran djinasatnja soewamikoe dan atoer apa jang perloe di dalem roemah tanggakoe; lantas akoe bersoempah di hadepan aboe soewamikoe jang akoe aken bikin pembalesan pada moesoe-moesoe jang

soedah membinasaken padanja.

Akoe poen sampe mengarti jang akoe boekan ada tandingannja dari See Tjong Pin tetapi akoe ingin bertaroeng padanja sampe di sa'at jang aken me-moetoesken siapa jang mati dan idoep.

Maka pada itoe malém djoega dengan tida ajal lagi akoe telah menjerboe masoek ka dalem fabriek tenoen Hin Liong.

Di dalem pertempoeran akoe dengan Ngo-in-pang-djit See Tjong Pin jang telah menjadi satoe per-kelaian mati atawa idoep, sekalipoen akoe telah goenaken Tjie-hiong-piao dan lepaskan itoe dengan dahsjat dan sampe bisa bikin loeka padanja, tetapi toch memang dasarnja akoe boekan ada iapoenja tan-dingan dan ia soedah goenaken satoe kali lagi sen-djata resianja jang terlarang dipake di kalangan Kang-ouw terhadepkoe. Memang sasoenggoenja sen-djata itoe ada amat lihay dan akoe poen soedah tida bisa menjingkir dari toe serangan jang sanget ber-bahaja jang mana achirnja telah membikin akoe dapet loeka-loeka sanget berat. Itoe koetika akoe sanget mengharep soepaja ia teroesken serangannja dan abisken sadja djiwakoe. Tetapi, iboe, siapa njana jang itoe toewa bangka roepanja memang tida ada niatan aken ambil djiwakoe, malah sebaliknya — tida taoe ia dapet mengatahoein dari mana akoe poenja asal oesoel. Akoe bisa bilang begitoe oleh kerna itoe masa, dengan setjara sanget sompong dan soeara besar ia telah mengoetjapken perkatahan jang sanget menghina dan bilang: Orang bilang soedah sanget broentoeng soedah bisa boenoeh satoe Kim Boen Kiem, tetapi sasoenggoehnja sekalipoen bisa boenoeh sampe sepoeloeh Kim Boen Kiem poen masih belon teritoeng begitoe berharga dari pada soedah bisa bi-kin loeka satoe Tjoe-bo-kim-so Tam Tjoe Sian poen-ja anak prampoewan."

Lebih djaoeh ia poen bilang jang ia sanget ingin-ken bikin satoe pertemoean dengen itoe djago toe dari kalangan Kang Ouw jang termashoer; ia nanti toenggoe dengen soenggoeh-soenggoeh kadatengan-nja ajah di kota Yangtjioe.

Menginget jang ajah poenja oesia soedah tinggi sasoenggoehnya akoe poen tida ingin ganggoe padanja, tetapi apa tjilaka, sekalipoen akoe masi berada dalem satengah oemoer, dengen rasa menjesel jang akoe soedah tida bisa indjek kota Yangtjioe sedeng ini anak — Siao Tiap-dji jang nasibnya malang masi beroesia sanget moeda; di dalem keadahan jang demikian serba katoetoep, maka akoe telah pikir tida ada laen djalan lagi katjoewali dateng mengadep pada orang toea sendiri.

Akoe sebagai satoe anak prampoewan, tentoe sekali akoe tida merasa kaberatan terhadep djiwakoe sendiri; tapi jang akoe paling poedjiken dan harep dengen sagenap hati adalah soepaja bisa melindoengin ini satoe-satoenja djiwa goena menjamboeng toe-roenan soewamikoe — Kim Boen Kiem.

„Iboe,” begitoelah Tam Swat Yong toetoep perkatahannja, „apakah kaoe soedi maloemken padakoe ini?”

„Kaoe bangoenlah Ko Naynay, perkara soedah mendjadi begini; apa maoe dikata! Kaoe berdoewa telah melaloein perdjalanan jang begitoe djaoeh dan soedah tentoe ada sanget lelah, sekarang kaoe boleh pergi mengasoh doeloe dan menoenggoe, apabila ajahmoe soedah selesai bersamedhi kaoe boleh katemoe-ken ia. Tetapi akoe peringetken dengen sanget, danganlah kaoe berbitjara sembarang di hadepannja kerna kaoe haroes taoe bahwa ajahmoe soedah lama tida tjampoer tangan lagi tentang oeroesan-oeroesan dari kalangan Kang-ouw. Apapoela sebagimana kaoe poen taoe jang soewamimoe ada bertabeat sompong

sekali; ia merasa diri sendiri tjoekoep paham ilmoe silat ditambah poela dengen keadahan jang broentoeng mendjadi satoe soedagar hartawan dalem kota Yangtjioe, maka tida heran kaloe ia lantas tida pandang pada laen orang.

Orang jang dengen tabeat demikian masatah bisa tida dapet mendatengken bahaja. Sekarang orangnya poen soedah tida ada lagi, tetapi akoe poen boekan bermaksoed mendjelekin padanja. Maka djika menoeroet akoe poenja pikiran paling baek kaoe bersabar doeloe, toenggoe sampe soedah liwat beberapa hari baroelah kita berdaja bagimana pantasnya," berkata Tjin Liong Tjeng seraja perentahken satoe baboe anterken Tam Swat Yong berdoewa ka kamar samping jang memang soedah disediaken terlebih doeloe.

Sasampenja di kamar terseboet Tam Swat Yong merasa hatinya ada sanget piloe dan pedih, walau poen begitoe toch ia tida bisa berboewat laen dari pada bersedih dan menangis.

Tetapi sebaliknya Siao Tiap-dji dasar anak laki-laki — biar oemoernja masih moeda hatinya ada lebih tegoh, soesoetin aer mata iboenga sambil boedjoekin ia djangan menangis.

„Kaoe taoe apa, anak goblok! Djika ini waktoe iboekoe jang aseli masih ada, dan kita dapet katjilakah seperti begini, akoe bisa pastiken ia aken koetjoerken setaoe sampe brapa banjak aer mata. Beginilah rasanja orang jang tida poenja iboe!" saoet Tam Swat Yong kepada poetranja.

„Iboe, djangan kaoe terlaloe berdoeka, akoe rasa Aki-loewar tentoe aken oeroes perkara ini," memboedjoek lagi Siao Tiap-dji.

Tam Swat Yong sambil golengken kapalanja berkata, „Ini djoega belon bisa dibilang apa-apa terhadep ini oeroesan, paling baek kaoe djangan sekali-

kali bitjara sembarang. Djika perkatahan tadi dapet didenger oleh Ma-loewar, ada banjak harepan ia aken moerka dan kamanatah kita bisa pergi bernaoeng?"

Siao Tiap-dji jang mendenger perkatahan iboenja manggoetin kapalanja dan tida bitjara lagi.

Di kamarnja Tam Swat Yong ada sanget sepi, tida terdenger ada soewara apa-apa katjoeali, soewara kateproekannja dari tindakan boedjang-boedjang. Begitoelah sateroesnja marika diam di kamarnja; sampe kira-kira soedah liwat tengah hari baroelah dateng satoe boedak soeroean Tjin Liong Tjeng mengasi taoe, bahwa marika sekarang boleh pergi ka kamar belakang boewat katemoeken Tjoe-bo-kim-so Tam Tjoe Sian.

*

Tjie-hiong-piao Tam Swat Yong dan Siao Tiap-dji teranter oleh boedak Ah Kwie menoedjoe ka kamar belakang di tempat mana Tam Tjoe Sian bersamedhi. Begitoe lekas marika sampe di depan pintoe kamar itoe, Ah Kwie lantas boekaken kere bamboenja seraja bilang: „Ko Naynay, silahkan masoek sendiri, akoe tjoema bisa anter sampe di sini, oleh kerna kita orang tida diperkenanken masoek ka dalem kamar." Satelah bilang begitoe ia lantas balikin badan dan berlaloe.

Tam Swat Yong toentoen anaknja masoek ka dalem kamar itoe. Ternjata kamar itoe ada satoe kamar ketjil, di sini tida tertampak barang-barang jang mentereng, tetapi kaliatannja ada sanget keran dan angker. Semoewa perkakas roemah roepanja ada terawat sanget resik, kerna ternjata di atasnya tida ada sedikit poen aboe, dan tjahaja mata hari poen ada tjoekoep terang.

Tjoe-bo-kim-so Tam Tjoe Sian tertampak sedeng bersila di atas satoe korsi besar di sabelah tembok

barat. Maskipoen oesiahnja soedah tinggi, tetapi tida ada sedikit kaliatar lojo, malahan moekanja tertampak lebih merah dan bertjahaja, dan ada sanget keren.

Tam Swat Yong madjoe kahadépan ajahnja dan berloetoet seraja berkata: „Ajah, anakmoe soedah lama tida dateng menjambangin, ma'afkenlah! Apa ajah ada baek?”

Siao Tiap-dji poen tida ajal lagi lantas berloetoet dan hatoerken hormatnja.

Tam Tjoe Sian sasoedah meliat marika masing-masing memberiken hormatnja sambil oesap djeng-gotnja jang berwarna oengoe dan berkata: „Ko Nay-nay, kaoe masih inget pada ajahmoe jang toea ini? Bagoes! bagoes! silahken kaoe orang masing-masing doedoek.”

Tam Swat Yong tida beriken penjaoetan, lantas doedoek di satoe korsi di depan djendela dan Siao Tiap-dji berdiri di sampingnja. Sabelonnja ia bertemoe dengen ajahnja, ia merasa ada sanget banjak perkara jang aken dibilitaraken, tetapi sasoedah ia bertemoe, ia tida taoe apa jang haroes dibilitaraken terlebih doeloe.

Tam Tjoe Sian memandang pada marika iboe dan anak berdoewa dan menarik napas, seraja bilang: „Saoemoer idoepkoe jang akoe selaloe pikirken jaitoe djanganlah akoe sampe karembet-rebet oleh perkara anak tjoetjoe, tetapi sekarang ternjata akoe soedah terlibet dengen perkaramoe ini; soedah begitoe banjak tempo jang akoe soedah boewang boewat asingken diri dari doenia loewar, sekarang soedah menjadi sia-sia sadja. Baeklah sekarang kaoe tjeritaken tentang kadjadian-kadjadian jang berhoe-boeng dengen kamatiannja soewamimoe. Tetapi inget! Kaoe tida boleh berdjoesta.”

Tam Swat Yong sembari menjapoe aer matanja seraja bilang, „Ajah, ma'afkenlah anakmoe jang berdosa ini. Apakah akoe ada begitoe banjak kabranian boewat mendjoesta pada kaoe?”

Kamoedian Tam Swat Yong lantas toetoerken dari awal sampe achir tentang bentrokan antara doea fabriek tenoen Lo-boen-kie dan Hin Liong. Sepandjang Tam Tjoe Sian mendengerken keterangan poetrinja berbitjara tida brentinja ia gojang-gojang kapalanja. Sasoedah ia denger selesai keterangan itoe baroelah ia berkata: „Ko Naynay, djika mendenger keteranganmoe ini, maka pantaslah Kim Boen Kiem telah terboenoeh oleh moesoehnya, saolah-olah ia telah mengoendang kamatian sendiri. Tetapi Ngo-in-pang-djit See Tjong Pin poen ada terlaloe kedjem, ia soedah melanggar oendang-oendang Kang-ouw tentang memake sendjata resia. Akoe poen ada mempoenjain tjara-tjara jang aken membikin beres. Begitoe djoega akoe sampe mengarti maksoedmoe dateng kasini boewat minta akoe toeroen tangan membales sakit hati soewamimoe.”

„Ajah, hareplah kaoe djangan ragoe-ragoe,” menjelak Tam Swat Yong. „Apabila poetrimeo masih bisa dapetken laen djalan boewat ia lolosken dirinja, ia poen tentoe tida nanti brani ganggoe katentreman hati ajahnja. Akoe poen tahoe bahwa perboewatan-koe ini ada tida betoel, tetapi oleh kerna gentjetan-gentjetan dari fihak moesoeh ada sanget heibat dan akoe poen soedah tida bisa dapetken laen tempat boewat bernaoeng lagi selaennja dari ajah, maka akoe memoehoen ajah soeka kasianin iboe dan anak jang bernasib malang ini. Dan djika sebaliknya sampe akoe berdoewa moesti terloentah-loentah di tempat laen, apatah ini boekan djadi satoe hina'an boeat ajah? Dari itoe akoe moehoen beriboe ma'af dan harep ajah soedi briken akoe petoendjoekmoe jang

berharga. Djika sampe ajah merasa kaberatan boewat akoe tinggal di sini, ini tida kenapa asal sadja ajah briken idzin akoe titipken Siao Tiap-dji di sini, kerna inilah ada darah dagingnya Kim Boen Kiem; djiwa satoe-satoenja jang aken menjamboeng toe-roenan familie Kim."

Tjoe-bo-kim-so Tam Tjoe Sian gojang-gojang kapalanja seraja bilang: bahwa ia soedah bertahoentahoen tida tjampoer tangan dengen kalangan Kangouw, tetapi sekarang oleh kerna jang bersangkoetan di dalem perkara ada anaknya sendiri, maoe tida maoe soedah tentoe ia tida bisa peloek tangan sadja, tetapi begitoe djoega ia tida bisa berboewat djika ia sabelonna menjelidikin terlebih djaoeh. Dan ia poen lantas prentahken poetrinja boewat bersabar doeloe sampe ia kasi kabar lagi.

Tam Swat Yong bersama Siao Tiap-dji dengen hati piloe serta mengandoeng sedih melaloein kamar ajahnja; marika djoega tida mampir lagi di kamar Tjin Liong Tjeng dan teroes menoedjoe ka kamar depan kamarnja sendiri. Sesampenna dalem kamar, Tam Swat Yong berpikir dan dapet anggepan bahwa boekan sadja iboe tirinja sendiri djoega telah trima itoe dengen roman jang adem. Menginget sampe di sini sambil mengoetjoerken aer mata, ia pikir lebih baek binasa sadja di bawah sendjata resia moesoenja di kota Yangtjoe, dari pada moesti menanggoeng sengsara jang sedemikian beratnja. Tetapi sekarang perkara soedah djadi kepalang tanggoeng, djoega soedah tida ada laen djalan, selaennja dari pada siang dan malem berdiam di kamarnja jang soenji senjap seperti koeboeran adanja.

Tempo telah liwat seperti anak panah terlepas dari boesoernja, tida terasa lagi Tam Swat Yong tinggal di Tjip-sian-tjhung soedah tiga hari lamanja. Pada hari itoe Tjin Liong Tjeng telah oendang pada Tam

Swat Yong dan menerangkan bahwa ia aken brangkat poelang doeloe ka roemah iboenja oleh kerna ada satoe perkara jang soedaranja tida bisa bikin beres sedeng ajahnja — Tjin Giok Tjoan memang telah meninggal doenia sedari lama, maka kapaksa ia moesti djoega poelang boewat toeroen tangan sendiri. Berbareng dengan itoe ia poen tida loepa boewat nasehatin Tam Swat Yong soepaja berdiam dengan tenang dan menoenggoe doeloe, sampe ia kombali lagi; dan rawat baek-baek Siao Tiap-dji. Banjak harepan jang itoe oeroesan aken dapetken kapastian-nja.

Tam Swat Yong tida kasiken penjaoetan apa-apa, di itoe masa melaenken ia tjoema bisa toeroet sadja apa jang laen orang ada ootaraken. Ia poen sampé mengarti bahwa ia sekarang sedeng menoempang.

Walaupoen ajahnja ada ajah aseli tapi tentang oeroesan roemah tangga semoea soedah tentoe ter-serah pada iboe-tirinja. Maka ia poen soedah ambil katetepan jaitoe, melaenken sabar dan menoenggoe. Djika marika betoel-betoel tida maoe taoe dan oeroes perkaranja, soedah tentoe ia haroes mengambil ka-poetoesan sendiri, agar djangan sampe teranggep oleh ajah dan iboenja jang ia tjoema ada satoe pram-poewan jang pengetjoet dan tida brani berkordan.

Tjin Liong Tjeng telah brangkat dengan berpakean jang saderhana dan tjoema satoe boengkoesan ketjil dan sabatang pokiam.

Tam Swat Yong sedari ditinggal pergi oleh iboe tirinja, ia poen tida ada kerdjahan jang tertentoe, maka boewat meliawatin tempo jang iseng, ia djadi lebih banjak goenaken perhatian pada pengadjaran ilmoe silatnja Siao Tiap-dji; siang dan malem ia didik poetranja dalem segala tjabang ilmoe silat. Tida terasa lagi Tam Swat Yong tinggal di Tjip-sian-tjhung soedah meliawatin satengah boelan lama-

nja, tetapi ajahnja masih djoega belon memberiken kabar apa-apa, begitoepoen iboenja; jang mana telah menambahken kakeselannja terlebih dalem, tetapi tida djoega bisa didapetken tempat boeat melampias-kennja.

Memang peranginjya Tam Swat Yong tida bisa disamaken dengen prampoewan-prampoewan laen jang lemah lemboet dan soemangetnja poen ada banjak sekali mirip dengen adat ajahnja — keras dan angkoeh soengkan boewat toendoek di bawah laen orang. Dari itoe djika menoeroetin kamaoeannja sendiri, terlebih siang ia soedah berlaloe dari Tjip-sian-tjhung, tapi itoe soedah tentoe ada tida baek, kerna djadi ada di loewar tahoenna ajah dan iboenja jang memang ia harep boeat titipin Siao Tiap-dji. Tetapi djika tambah satoe hari lamanja menoenggoe ini berarti tambah satoe hari poela poenja kakeselan.

Di antara orang-orang jang bersympathie terhadep Tam Swat Yong tjoema Ah Kwie sadja saorang, djoestroe ia sadja jang sering menghiboer pada Tam Swat Yong dan bersama-sama menangis.

Pada satoe pagi, Tam Swat Yong seperti biasa doedoek bersedih di dalem kamarnja dan Siao Tiap-dji sedeng memaan di loewaran. Tatkala itoe Ah Kwie dateng membawa thee masoek ka kamar, meliat Tam Swat Yong sedeng menangis, lantas ia menghamperin seraja memboedjoek, „Ko Naynay, djanganlah kaoe terlaloe bersoesah hati, ini tjoema membikin roesak kaoe poenja kasehatan sadja dan nanti siapatah jang aken pimpin Siaoya. Kaoe haroes bersabar, masatah nanti kaoe poenja sakit hati achirnja tida terbales?”

„Ai! Ah Kwie, bagimana kaoe bisa taoe betapa soesah hatikoe ini; akoe berpendapetan jang akoe soedah tida ada pengharepan boewat laen orang poenja pertoeloengan, maka itoe kepaksa akoe jang ha-

roes toeroen tangan djoega. Dan apabila ada soewatoe hari sampe betoel-betoel telah tiba, akoe moehoen pada kaoe soekalah rawat Siao Tiap-dji baekbaek."

„Ko Naynay, djanganlah kaoe beranggepan begitoe!" menjelak Ah Kwie. „Kaoe moesti pertjaja nanti achirnja kaoe poen aken mengarti sendiri; bahwa tentang perkara ini Tjhung Tjoe dan Tjoeba tida aken biarken begitoe sadja. Akoe ini tjoema ada satoe boedak belian belaka, dan seperti kaoe poen taoe bahwa peratoeran di roemah ini ada begitoe keras sekali, maka kita orang boedjang-boedjang tida brani banjak bitjara meliwinatin dari apa jang samoestinja. Sabetoelnja akoe poen merasa terharoe dan sedih meliat keadahan kaoe ini, tapi akoe poen tida berdaja. Tjoema jang akoe bisa pastiken jaitoe, pertjalalah apa jang akoe bilang tadi, akoe tida nanti djoestaken kaoe dan akoe harep kaoe tida oesah beragoe-ragoe lagi tentang ini."

Tetapi Tam Swat Yong tetep tida pertjaja apa jang itoe boedak bilang padanja malahan ia minta Ah Kwie pergi ka kamar ajahnja boewat moehoenken idzin soepaja ia boleh bertemoe.

Ah Kwie gojang-gojang kapalanja seraja bilang: „Ko Naynay, kaoe djangan terlaloe terboeroe napsoe. Boekan akoe tida soeka menoeloeng, kerna djika Tjhung Tjoe tida panggil padamoe djangan harep kaoe bisa katemoeken ianja. Apabila kaoe memaksa, ini tjoema aken menambahken kasoesahanmoe sendiri sadja."

Mendenger perkatahan boedak ini, Tam Swat Yong djadi timboel sedikit tjoeriga dan ia djadi dapet pikiran boewat mentjari tahoe lebih djaoe hal-hal apa jang tersemboeni dalem perkatahannja, maka dengan lantas ia robah aer moekanja seraja bilang dengan menjindir:

„Ja, memang akoe poen tahoe jd. nasibkoe sangat boeroek, sampeken ajahkoe sendiri soedah tida perhatiken padakoe, akoe aken toenggoe sadja di sini sampe akoe mati oleh kerna mereres. Ah Kwie, sekarang kaoe boleh berlaloe sadja, akoe poen hendak mengaso.”

Sabenernya Ah Kwie soedah bertindak sampe di loewar pintoe, tetapi kerna mendenger perkatahan Tam Swat Yong itoe lantas ia balikin badan seraja berkata: „Ko Naynay, harep kaoe djangan djadi salah paham; kaoe ingin katemoe dengen Tjhung Tjoe itoe ada gampang, asal kaoe bisa toenggoe 10 atawa 15 hari lagi, itoe koetika maskipoen kaoe tida maoe katemoeken padanja, bisa dipastiken ia sendiri nanti tjari padamoe.”

Perkatahan Ah Kwie tadi soedah menambahken Tam Swat Yong djadi semingkin bertjoeriga, kerna di belakang itoe perkatahan soedah teranglah ada hal-hal jang ia' telah semboeniken atawa ada kedjadian-kedjadian jang tida terdoegah, maka dengen soewara jang sebagi memastiken ia berkata: „Ah Kwie, lekas bilang ada perkara apakah sabetoelnya jang kaoe telah semboeniken. Apakah akoe sebagi poetrinja sendiri hendak bertemoe dengen ajahnja masatah haroes menoenggoe hingga satengah boelan? Kaoe djangan koewatir Ah Kwie, akoe Tam Swat Yong djangan dipersamaken seperti laen prampoewan, akoe tida nanti memberatin laen orang dan nanti akoe jang tanggoeng djawab sendiri.”

„Tahoe-tah kaoe sekarang Lo-Tjhung-Tjoe ada di mana?”

„Kenapa kaoe tanja begitoe Ah Kwie, ia ada di kamar belakang boekan?”

„Ia soedah lama pergi dari sini!”

„Ka mana ia pergi? Ia toch soedah bersoempah jd. ia tida aken kaloewar lagi dari Tjip-sian-tjhung.”

„Ko Naynay, sabetoelnja akoe tida boleh boeka ini resia pada siapapoen kerna djika diketahoei oleh ka-doewa madjikan, tida bisa dibilang apa akoe masi bisa idoep atawa tida. Tetapi akoe tida tega meliat padamoe menanggoeng sengsara lebih djaoe, maka akoe kasi taoe padamoe teroes terang. Tjhung Tjoe itoe koetika sasoedahnja ia menemoein kaoe dan pada esok harinja ia dengen diam-diam telah berlaloe meninggalken Tjip-sian-tjhung pergi ka kota Yangtjioe, begitoe poen Tjoe Bo, apa kaoe kira betoel-betoel ia poelang ka roemah iboenja? Sasoedah ia dapet taoe Tjhung Tjoe pergi ka Yangtjioe, ia poen telah me-njoesoel pada esok harinja. Marikalah soewami-istri berdoewa pergi boewat bales sakit hati soewamimoe.”

Tjie-hiong-piao Tam Swat Yong mendenger ka-terangannja Ah Kwie sanget terprandjat seraja kata, „Ah Kwie, kaoe djangan boedjoekin akoe dengen mendjoesta! Apa ini sama sekali betoel? Kenapa marika tida kasi tahoe akoe? Meliat perlakoean ma-rika terhadep akoe, akoe masi ragoe-ragoe apa ma-rika maoe berboewat begitoe?”

„Ko Naynay, akoe tida maoe banjak bitjara lagi, djika kaoe sakiranja masi tida pertjaja djoega, silah-kenlah preksa di kamar belakang,” saoet Ah Kwie.

Menginget bahwa Ah Kwie tida pernah mendjoes-ta, djoega ia telah berbitjara dengen roman jang soenggoe-soenggoe, maka tjoekoelplah Tam Swat Yong poenja kapertjajahan padanja dan berkata: „Ah Kwie, kaoe telah tarohken dijwamoe oentoek kapentingankoe! Satoe boedi jang sanget besar, ker-na apabila ini hari kaoe tida terangken itoe padakoe, akoe telah ambil kepastian jang ini hari djoega akoe aken berlaloe dari sini.

Ja! Sekarang ajahkoe maskipoen kaliatannja ber-perangi seperti orang jang kedjem dan angkoeh, te-tapi oleh kerna ia ingin soepaja akoe tida menderita

sedih lebih lama, maka ia poen tida segan boewat melanggar soempahnja dan meninggalken Tjip-siantjhung. Begitoepoen iboe, walaupoen orang jang sehari-hari berdamping dengen ia poen tida gampang boewat bisa tebak apa jang ada di dalem hatinja.

Soenggoeh di loewar doegahan! Orang jang loewar biasa ini poen telah berboewat hal-hal jang loewar biasa djoega.

Ah Kwie, adikkoe jang baek! Sekarang akoe min-ta dengen sanget pada kaoe, soekalah sakiranja boewat samentara waktoe toeloeng djaga Siaoya; akoe tida bisa tjoema pelok tangan liatin sadja ajah dan iboe berdjoeang boeat kapentingankoe, tertambah lagi perkara ini tida aken bisa beres djika akoe tida berserta ada di sitoe, maka malem ini djoega akoe aken pergi ka kota Yangtjioe boewat ikoet berserta ajah dan iboe bikin beres perkara ini."

"Ko Naynay, harep kaoe soeka kasianin padakoe," meratap Ah Kwie. „Oleh kerna perboewatankoe jang lantjang, hingga sekarang sampe kaoe moesti ting-galken Siaoya pergi ka Yangtjioe. Apabila hal ini achirnja sampe katahoean oleh kadoewa madjikan, soedah tentoe akoelah jang mendjadi korban terlebih doeloe. Apakah kaoe tida bisa toenggoe boewat lamanja satengah boelan atawa satoe boelan lagi di sini? Marika poen tida aken selama-lamanja berdiam di sana dan tida poelang."

Tam Swat Yong meliat Ah Kwie sampe begitoe meratap, ia poen lantas poera-poera menghiboer dan bilang, „kaoe poenja omongan memang ada tjenglinja; baeklah akoe toenggoe bebrapa hari lagi sampe marika soedah kombali.”

Pada hari itoe Tam Swat Yong poen tida bitjarken lagi tentang kapergian ia itoe, dan tatkala pada malemnja sasoedah ia tidoerin Siao Tiap-dji, lantas ia menoelis sapoetjoek soerat jang dialamatken pada

Ah Kwie jang meinerangken bahwa ia pergi ka Yangtjoe, dan pesen wanti-wanti pada Ah Kwie soepaja toeloeng rawatin anaknya. Itoe malem djoega ia dengan membawa pokiamnya menoedjoe ka kota Yangtjoe.

Baek kita tinggalken sabentar doeloe pada Tjie-hiong-piao Tam Swat Yong jang menempoeh siang dan malem, panas dan hoedjan berdjalanan menoedjoe ka kota Yangtjoe. Tjoba kita berpaling pada Tjoe-bo-kim-so Tam Tjoe Sian sasoedahnja ia mendenger keterangan dari poetrinja dan mendapat taoe prihal kematian mantoenza, walaupoen di moekanja kalianan ia tida soedi tjampoer dalem ini oeroesan; tetapi ia sebagi satoe ajah di hatinja tetep menjinta poetrinja jang toenggal ini. Maka maoe tida maoe ia poen haroes tjaapein hati boewat oeroes padanja. Tetapi orang jang berilmoe seperti ia itoe soedah tentoe tida gampang sembarangan perliatken rasa hatinja di aer moekanja, apa poela sekarang ia baroe sadja dapetken keterangan tjoema dari satoe fihak.

Koetika Tam Swat Yong masih soeka berdjalanan di kalangan Kang-ouw walaupoen ia belon pernah bertemoe moeka dengan Ngo-in-pang-djit See Tjong Pin tetapi ia sering denger jang See Tjong Pin poen ada satoe gie-hiap, dan ia poen belon pernah denger bahwa ia pernah berboewat hal-hal jang tida tjetjok dengan prikemanoesiahan. Dari itoe hal kematicannja Kim Boen Kiem poen tida bisa didjatoken semoewanja di fihak ianja. Maka itoelah djoega sebabnya ia sengadja soedah kasi liat tampang dingin terhadep poetrinja, inilah djoega sebab-sebabnya jang ia telah pergi di loewar tahoenza ia.

Lo-enghiong Tam Tjoe Sian jang soedah 10 ta-hoen lebih tida indjek di kalangan Kang-ouw, maka ia sanget hati-hati di dalem perdjalananja, tapi ia poen tida brani memboewang banjak tempo.

Pada satoe hari sampelah Tam Tjoe Sian di kota Yangtjioe. Oleh kerna ia haroes menjelidikin lebih djaoeh tentang permoesoehan antara kadoewa fabriek tenoen Lo Boen Kie dan Hin Liong, maka ia telah menginep di satoe hotel di sabelah bagian timoer kota Yangtjioe. Pada esok harinja, Tam Tjoe Sian soedah bisa dapet keterangan tentang peristiwa itoe dari salah satoe djongos hotel jang ia menginep; dan jang ia paling tida senang dalem ini perkara jaitoe boleh dibilang semoewa orang telah rame tjeritaken hal itoe. Tjoe-bo-kim-so Tam Tjoe Sian dengan terliti saring segala keterangan-keterangan jg. ia dapet, maka pada achirnya ia dapet kasimpoelan bahwa kematianna Kim Boen Kiem ada seperti apa jang ia soedah doegah terlebih doeloe, jaitoe disebabken oleh iapoenja kasombongan. Dan ia poen djadi merasa goembira jang ia soedah tida berboewat dengan sembrono tentang peristiwa ini.

Peristiwa terboenoehnja Kim Boen Kiem telah terjadi kira-kira pada 3 boelan jang telah laloe. Loekanja Boen Lam Hin poen soedah semboeh dan telah poelang ka roemahnja lagi di Yangtjioe. Begitoe djoega Ngo-in-pang-djit See Tjong Pin soedah tida sabar lagi boeat tinggal lebih lama di fabriek tenoen Hin Liong, dan telah poelang ka Pek-lauw-teng.

Tjoe-bo-kim-so Tam Tjoe Sian sasoedah dapetken keterangan jang ia rasa tjoekoep, maka ia telah ambil poetesan boewat pergi sendiri ka Pek-lauw-teng; boeat katemoeken pada See Tjong Pin. Sesampenja Tam Tjoe Sian di Pek-lauw-teng ia telah menjamar sebagai saorang jang sedeng pasiar meliat-liat pe-mandangan, dan ia menginep di satoe kampoeng dari toekang-toekang tangkep ikan jang berada di sabelah oetara Pek-lauw-teng.

Sasoedah Tam Tjoe Sian merasa tjoekoep terang

seloek-beloeknja di sakiter poelo Pek-lauw-teng, maka pada satoe sore koetika matahari moelain terbenam di sabelah barat, ia samperin salah satoe toekang tangkep ikan dan minta sewa prahoenna boewat ia pasiar. Toekang ikan telah anggep Tam Tjoe Sian ada satoe orang jang dari kalangan atas, dan ia poen soedah brani bajar sewahan dengen mahal, maka dengen tida tjoeriga lagi lantas kasihken prahoenna pada ia. Tetapi toekang ikan itoe tida loepa soedah mengingetin pada Tam Tjoe Sian boewat djangan gegabah pergi masoek ka Pek-lauw-teng; sebab djangan kata di waktoe malem, siang poen tida boleh sembarang orang masoek ka sitoe. Tam Tjoe Sian poen tida banjak rewel pada toekang ikan dan manggoetin kapalanja menandaken jang ia mengarti apa jang toekang ikan telah bilang.

Tam Tjoe Sian mendajoeng prahoenna dengen pelahan-pelahan menoedjoe ka arah Pek-lauw-teng. Di bawah sinarnja boelan poernama, sasoenggoehnja pemandangan di sakiternja Pek-lauw-teng ada sanget permei dan indah, di sakiternja tepi laoet dari poelo Pek-lauw-teng ada ditanemin penoeh dengen poehoen Yanglione. Ia dengen pelahan mendajoeng prahoenna menoedjoe ka salah satoe poehoen Yanglione jang besar, begitoe lekas sasoedah ia tiba, di bawahnja bajangan dari itoe poehoen, lantas ia naek ka darat dan semboeniken prahoenna di sitoe djoega dan dengen terliti iket tambangnja ka tjabang poehoen. Sasoedah selessei, ia dengen berhati-hati djalan menoedjoe ka arah tengah itoe poelo. Djoestroe itoe koetika soedah djaoeh malem keadahan di itoe poelo ada sanget sepi. Kerna memang jang tinggal di dalem itoe poelo djoemblah sama sekali tjoema kira-kira ampat poeloeh roemah.

Tam Tjoe Sian dengen terliti memerekxa di sakiternja poelo dan dapet kenjataan bahwa poelo ini tida

mirip dengen tempat kadiamannja orang-orang dari kalangan Liok-lim (kalangan perampok). Walaupoen begitoe ia tetep berlakoe awas, kerna ia ada orang jang soedah kawaikan di kalangan Kang-ouw, selaloe menjegah soepaja djangan kerna tjerobo jang sedikit dan menderita tjilaka besar.

Di antara poehoen jang lebet ada terdapat satoe djalan ketjil menoedjoe ka arah tengah poelo dan Tam Tjoe Sian dengen berhati-hati mengikoetin djalanan itoe, tetapi ia tida tahoe di mana tempat kadiamannja See Tjong Pin; ia soedah liwatin bebrapa roemah-roemah jang pintoenza tertotoet rapet menjataken jang poenja roemah soedah masoek tidoer! Tetapi ia masih belon bisa berboewat apa-apa; itoe koetika soedah ampir mendeketin tengah malem. Kamoedian sasoedah ia madjoe bebrapa poeloeh tindak ka sabelah oetara baroe bisa kaliatan oedjoenga Pek-lauw-teng, tapi di kanan dan kiri tida tertampak sedikitpoen penerangan. Sesampenja di sini ia djadi berpikir: djika malem ini akoe tida bisa dapet tahoe roemahnja See Tjong Pin, maka kepaksa besok akoe moesti dateng lagi boewat katemoeken padanja.

Di tengah-tengah djalan terseboet ada satoe perapatan dari mana orang bisa liat ka arah oetara dan selatan djaoeh sekali, tjoema di bagian timoer dan barat ada terdapat bebrapa roemah-roemah atep dan sagrombolan poehoen-poehoen jang soesah bisa ditaksir terpisa brapa djaoehnja. Tetapi Tam Tjoe Sian soedah tentoe tida maoe menjerah begitoe sadja maka ia lantas samperin salah satoe poehoen siong jang paling tinggi di antaranja dan dengen menggoenaken ilmoe mengentengin badan melompat ka atas poehoen itoe. Dengan moedah ia soedah berada di atas tjabang poehoen terseboet bebrapa toembak tingginja; kadoea tangannja memelok batangnja poe-

hoen dan kadoewa oedjoeng kakinja mendjepit di bagian bawah; sebagai rasé atawa koetjing dengen gampang ia telah mandjat ka bagian jang lebih tinggi dan dari ini tempatlah ia lantas bisa memandang dengen teges ka bagian timoer dan barat dari Peklauw-teng.

Di bagian timoer sabegitoe djaoeh terliat, pepoe-hoenannja ada lebih lebet dan di dalem itoe di satoe bagian dengen samar terliat ada sedikit memantjar sinarnja lampoe, tetapi bajangan poehoen-poehoen telah menoetoepin dan membikin pengliatan djadi tida njata. Samentara Tam Tjoe Sian berada dalem keadahan jang ampir poetoes asa dan hendak berlompat toeroen poela ka bawah poehoen, pada telinganja sakoenoeng-koenjoeng terdenger ada soewara jang samar-samar. Ia tetepken badannja dan dengen terliti dengerin, ternjata jang itoe soewara telah dateng dari djoeroesan selatan-timoer. Itoe soewara poen tida bisa disangkal ada kerna bentrokannja benda dari besi, dan di antaranja ada djoega tertjampoer dengen tereakkannya orang, tetapi menjesel oleh kerna tertjampoer dengen soewaranja gojangan daon-daon poehoen jang tertioep angin, hingga tida bisa dipastiken dengen tepat di mana adanja.

Tam Tjoe Sian soedah djadi lebih tida sabar, maka dengan satoe lompatan ia telah melajang dan soedah berada poela di bawah itoe poehoen; menoeroetin datengnja soewara tadi dan menoedjoe ka arah selatan-timoer dengen melaloein poehoen-poehoen jang lebet. Begitoe lekas sasoedahnja dapet liwat in itoe grombolan poehoen-poehoen dan berdjalan madjoe, baroe beberapa tindak djaoehnja, biloek melingkoengin poehoen-poehoen to jang berada di pinggir djalan, dalem penjelidikan jang ampir sadja poetoes harepan telah timboel sedikit kagirangan.

Kerna di hadepannja dalem djarak kira-kira berapa toembak djaoehnja ada tertampak sagoendoekan poehoen-poehoen peksiong jang sanget lebet. Dari renggangnja pongkot-pongkot poehoen terseboet terliatlah lebih njata jang sinar lampoe itoe telah memantjar dari bagian tengah itoe grombolan poehoen; dengen tida ajal lagi ini Lo-enghiong lantas toe-toepin badannja dan dengen tjepet telah madjoe bertindak ka depan.

Begitoe lekas ia tiba di tengah-tengah itoe grombolan poehoen-poehoen, tertampaklah di hadepannja saderekan dingding tembok rendah jang sepandjangnya itoe tembokan ada tertotoep dengen tjabang-tjabang poehoen Yanglloe.

Sasoedahnja ia mengawasin keadahan sakoeliling-nja dengen terliti, lompatlah ia ka atas dingding tembok tadi dan mengoempet di antara tjabang-tjabang Yanglloe sambil mengamat-amatin keadahan di dalemnya. Di sitoe ternjata adalah djadi bagian depan dengen lapangan jang agak loewas, dan djoega tida terdapat banjak pendirian roemah-roemah. Dari atas Tam Tjoe Sian telah goenaken tipoe „Tauw Sek Boen Lo” jaitoe menimpoek dengen batoe oentoek mentjoba apa di dalem itoe ada manoesia atawa tida, ternjata tida ada terdapat perobahan apa-apa, sigra ia lompat ka bawah, berbalik menoedjoe ka belakang dan berdjalan menoedjoe ka arah timoer bagian depan itoe roemah, madjoe poela bebrapa tindak dan achirnja berlindoeng di bagian belakang dari satoe poehoen besar. Dari itoe tempat tertampaklah sarentetan djarodjaro bamboe dan di dalem itoe djarodengen penerangan lampoe jang remeng-remeng ternjata ada satoe paseban jang loewas dan di tengah-tengahnja terliat ada orang jang sedeng berlatih dengen sendjata.

Orang jang sedeng berlatih itoe ada berdoewa;

satoe memegang sepasang toja pendek dan jang ka-doewa menghoenoes Kwie-tao-to (golok tebel), dan pada masa itoe marika sedeng berlatih dalem babakan jang sanget seroenga, dengen masing-masing setjara jang sanget sengit menjerang dan membela dirinja.

Tam Tjoe Sian menjaksiken dengen perasahan djadi terlebih tida sabar, tetapi menjesel jang ia tida bisa mendeketin. Ia menoleh ka samping ternjata di sitoe ada doewa batang poehoen besar; ia mendoegah pasti jang apabila dari atas itoe poehoen soedah tentoe ia aken bisa meliat ka dalem terlebih njata serta sambil mengamat-amatin gerak-geriknya di dalem; maka itoe dengen sigra Tam Tjoe Sian telah merajap mandjat ka atas itoe poehoen kira-kira doe-wa sampe tiga toembak tingginja. Dari sitoe dengen saklebatan sadja ia soedah bisa meliat dengen tepat segala keadahnja dalem itoe paseban jang terlin-doeng dengen djaro-djaro bamboe tadi. Di bagian depannya terdapet ada tiga kamar, di oetara tjoema ada doewa sadja, selaennja itoe tida ada terdapet laen-laen pendirian, katjoewali di sapoeternja tjoema ditanemin dengen matjem-matjem boengah, dan di tengahnja ada teroeroek dengen pasir-pasir jang sanget rata.

Selaen itoe doewa orang jang sedeng berlatih mati-matian, di depan kamar sabelah timoer tertampak poela ada doewa orang sedeng berdiri. Satoe antaranja jang kira-kira beroesia 60 tahoen, menoeroet penoetoeran poetrinja — Tam Swat Yong roepa-roepanja djoestroe ini dialah orangnya jang ia sedeng tjari jaitoe Ngo-in-pang-djit See Tjong Pin; di sampingnya ada berdiri satoe orang jang oemoernja kira-kira baroe 40 tahoen lebih beralis kerén dan matanja seperti harimau, tampangnya ada sanget menjeremken dan sedeng oeplek beromong dengen

See Tjong Pin sambil tertawa.

Berpaling poela pada itoe doewa orang jang sedeng berlatih, jang memegang doewa toja saban-saban ia madjoeken ka depan sendjatanja sambil tiap kali dipentang dan dirapetin, jang mana telah menimboelken soewara-soewara jang sanget keras. Kamoedian dengen tiba-tiba ia telah goenaken tipoe Yauw-tjoe-tian-tjie (boeroeng alap-alap mementang sajap), sepasang sendjatanja ia angsoerken ka depan dan pentang ka kiri dan ka kanan sampe di loewar badan, sedeng badannja mengegos boewang ka kanan dan belakang dengen satengah rebah dan berbareng iapoenna. sepasang sendjata bergantian menjamber ka bagian loewar badan; gerakannja sanget gesit dan serangan tangannja poen tida koerang tjepetnja, dan dengen setjara kilat tangan kanannja telah menjamber ka bagian kapala jang memegang golok; si pemegang golok poen ada sampe tjoekoep lihay, kerna dengen lantas sadja ia tarik kapalanja ka bawah sambil miring ka sebelah kiri, serangan-serangan mana djadi memoekoel angin, tetapi sendjata dari tangan kirinja telah menjamber poela dengen sama tjepetnja. Ini kali si pemegang golok lantas melangkah setindak ka belakang sambil goloknja disabekken ka arah sendjata lawanannja hingga toja itoe terpelanting ka samping dan ia poen lantas batjoken goloknja ka lawanannja, tetapi dengen sekedjap toja jang berada di tangan kanannja soedah menjerang poela, hingga itoe tiga sendjata beradoe djadi satoe dan soedah menimboelken soewara jang sanget keras, kerna itoe, tiga-tiga sendjata telah terlepas dari tangannja masing-masing dan djato ka atas tanah; berbareng dengen itoe, itoe sepasang djago-djago berbareng lantas tertawa berkakakan.

Samentara itoe Tam Tjoe Sian telah mengawasin dengen terliti itoe doewa orang jang baroesan abis

berlatih; jang memegang sepasang toja kira-kira beroesia 40 tahoen lebih, berbadan sedeng dan mempoenjai alis dan mata jang kerén; adalah itoe jang memegang Koei-tao-to berbadan pendekan, alisnya ketjil dan matanja sipit, tapi sinar jang kaloewar dari matanja ada sampe tjoekoep tadjem, dengen sakelebatan lantas bisa ketahoei jang ia ada dari kalangan Kang-ouw jang soedah oeloeng dalem pengalamannja.

Dari marika poenja penjaoetan-penjaoetan satoe dengen laen njatalah itoe satoe di antaranja doewa orang jang sedeng djalan menghamperin ka pertengahan pada jang baroesan berlatih, bener ialah See Tjong Pin adanja, dan jang berdjalan bersama-sama ia adalah diseboet Yo Lo-soe.

Itoe koetika See Tjong Pin telah menghamperin pada itoe orang jang tadi menggoenaken sepasang toja dan berkata: „Tjio Soetee, gerakan tanganmoe sasoenggoehnja sanget lihay, sedengken sama-sama persoedaraan sendiri berlatih, hingga tida barang satoe tindak jang telah briken kalonggaran padanja; tida heran kapan kaoe ada sanget ternama di kalangan Soe Tjoean, sedengken di kalangan Kang-ouw poen tjoekoep harepan boeat dapetken nama jang mentereng.”

„See Lo-soe sabetoelnja tjoema meliat sadja akoe poenja serangan dan tangkisan; tida perhatiken Ham Soehoe poenja ilmoe golok jang sanget lihay. Apabila sedikit sadja orang tida berhati-hati terhadep ia, akoe rasa tida bisa terloepoet moesti dikorbanken olehnya,” saoet itoe orang she Tjoe.

Di dalem itoe pembitjaraan jang sanget goembira dibarengin marika sama-sama tertawa bergelak-gelak dan kamoedian See Tjong Pin berkata poela: „Persilahkanlah kita orang sama-sama ka dalem sabentar lagi tentoelah toeroen emboen, kerna ini tempat sa-

poeterinja ada dikoelilnigin oleh aer, dan akoe sanget menjesel jang di sini tida terdapat tempat boewat menghormat pada tetamoe, tapi djika begitoe lekas kapan ini oeroesan soedah djadi beres, akoe aken temenin semoewa Hengtee-hengtee jang berada di sini boewat pergi di kota Yangtjioe, di sitoelah kita orang ambil plesir boewat beberapa hari lamanja, djoega nanti akoe soeroe moeridkoe jang bodo itoe membajar kaoel," sambil berbitjara marika sambil berdjalan menoedjoe ka kamar sabelah timoer dan masoek, sedeng di itoe paseban telah dateng satoe boedak jang benahin semoewa perkakas serta pademin lampoenja dan lantas berlaloe.

Di kamar di mana marika pada masoek lampoenja ada sanget terang, Tjoe-bo-kim-so Tam Tjoe Sian merasa goembirah sambil manggoet-manggoet dan berkata dalem hatinya: ini sebaliknya ada lebih baek, kerna dari gelagatnya See Tjong Pin terang sekali jang ia soedah adaken perdjamoean, dan marika itoe tadi pastilah ada pentolan-pentolan oeloeng dari kalangan Kang-ouw jang sengadja dioendang olehnya boewat membantoe padanja, akoe Tam Tjoe Sian dalem segala hal moesti berlakoe dengan terang benderang, masatah sasoedahnja sakean lama mengasingken diri dan lantas akoe moesti mengindjek poela dalem kalangan Kang-ouw?

Kamoedian ia lantas menggoenaken ilmoe Keng-sian-soet jaitoe ilmoe mengentengin badan, dengan sakedjepan ia soedah berada di emperan itoe kamar, dan di sitoelah ia telah mengoempet sambil mendengerin pertjakepan di dalem.

„See Lo-soe," begitoe telah dioetjapken oleh itoe orang jang beralis kerén pada See Tjong Pin, „apa jang kaoe telah atoer tadi sasoenggoehnja boewat akoe Yo Tiong — tida moefakat, kerna di kalangan Kang-ouw kita senantiasa mengoetaraken

kabranian; menoeroet pendapetankoe, saharoesnja kaoe jang lebih doeloe moesti mengoendjoengin Houw-gee-san dan berdaja sampe bisa berdjoempah sendiri ka hadepannja Tam Tjoe Sian, di sitee kaoe tjeritaken dengen sadjoedjoernja serta saterang-terangnya itoe hal dari awal sampe achir. Lo Eng-hiong Tam Tjoe Sian soedah teritoeng salah satoe orang jang ternama, akoe tida pertjaja jang ia aken lantas bergerak dengen sembarang dengen tida memperdoeliken kabeneran; dengen mengandel pada kapandean jang sanget tinggi lantas djalanken pembalesan kerna kematian mantoenja. Apabila kamoe-dian ternjata sampe betoel-betoel ia tida memperdoeliken lagi mana jang bener atawa salah, itoe koe-tika poen masih belon djadi kasep oentoek kita mengoendang soedara-soedara kita dari Kanglam dan Kangpak dateng berkoempoel boewat roendingken lebih djaoeh. Sekarang kaoe menoenggoe iapoенja kadatengan kemari, ia dateng atawa tidanja soesah dipastiken, sampe di waktoe manatah kaoe aken me-noenggoe."

„Djalan jang demikian boekan akoe belon pikir,” saoet See Tjong Pin, „djoega akoe telah lakoeken itoe serangan jang berbahaja dalem sa’at-sa’at jang sanget terpaks, sekalipoen bisa dibilang jang akoe soedah berboewat terlaloe kedjem terhadep satoe prampoewan, akoe pertjaja jang Tjoe-bo-kim-so Tam Tjoe Sian tida gampang aken lantas pertjaja pengadoean-pengadoean poetrinja. Tetapi apabila akoe pergi ka Tjip-sian-tjhung katemoein sendiri padanja, akoe koewatir jang ia aken salah paham dan anggep akoe telah mengoendjoeken lebih banjak kabranian, sedengken memang soedah terang kematian mantoenja begitoe poen terloekanja poetrinja semoewa ada dari tangankoe, maka itoe ada sanget besar kamoeng-kinan jang ia aken dateng boewat beritoengan ka

sini. Dari itoe akoe soedah ambil katetepan boewat menoenggoe sadja kadatengannja, dan di dalem ini doewa-tiga boelan akoe rasa moesti ada pergerakannya."

Tjoe-bo-kim-so Tam Tjoe Sian selama ia mendengerken marika berbitjara telah tetepken satoe kepastian, biar begimanapoен achirnja aken berakibat jang perkara ini haroes diberesken dengen djalan perklaian, dan ia sekarang soedah sampe di Peklauw-teng tida nanti ia aken berlaloe dengen begitoe sadja, sebaliknja ia ingin mentjoba pada marika oentoek mengetahoei sampe brapa tinggi marika poenja kepandean adanja.

Tam Tjoe Sian tida ajal lagi lantas ia melajang ka atas tanah dari emperan jang ia tadi menggelantong, ia moendoer tiga tindak dari depan itoe djendela kamar; bikin ringkes saloeroeh pakeannja, sambil menggoenaken ilmoe Khi-koan-tan-thia bikin djedjek besihnya dan pasang rendah badannja; kadoewa telapakan tangannja dihadepken ka depan dada, sambil menggoenaken kakoewatan jang berada dalem saloeroeh toeboehnja, kadoewa tangan itoe berbareng digeraken ka depan sahebat-heibatnja. Pergerakan demikian sekalipoen memoekoel kosong, tapi geterannja telah berakibat jang itoe djendela bergerak sebagi tertioep oleh angin jang sanget santer dan seantero kertas jang tertempel di saloeroeh djendela-djendela poen telah terlepas dan pada sobek.

Saking kerasnja itoe angin jang telah menerobos masoek ka dalem djendela meliwinati kertas-kertas jang soedah robek, djoestroe di belakang itoe djendela memang ada satoe medja patsian di kiri-kanan-nja itoe medja ada doewa krosi dan dengen kabettoelan di atas doewa korsi toe ada berdoedoek itoe doewa Enghiong; jang satoe jaitoe Penjamoen Besar dari Daerah Soe-tjoan Tjio In Teng dan jang

laen jaitoe Alap-alap Malem Ham Siao Tjoan. Marika berdoedoek di doewa korsi tadi dengen membelakangin djendela menghadep ka dalem roewangan sedeng asik berbitjara dengen jang laen-laen ; dengen tiba-tiba dan tida terdoega angin tadi jang demikian santernya telah langgar belakangnya marika berdoewa dan telah mengakibatken marika sama-sama kajoek-njoek ka depan.

Sekalipoen di antara marika tida ada jang mempoenjain kepandean seperti itoe, tapi marika bisa pastiken jang dateng itoe soedah tentoe orang jang berilmoe tinggi.

„Hei, sobat!” tereak Hongyang Bo-soe Yo Tiong dengen soewara sanget keras, „apabila kaoe soedah dateng ka sini kenapa tida maoe dengen berterang ? Dengen menggelap mempergoenaken kepandean demikian, itoe tida bisa dibilang satoe perboewatan dari satoe Eng-hiong jang toelen. Toenggoelah sobat di sitoe !” Berbareng dengen terdengernya itoe soewara tereakan, lampoe-lampoe di dalem poen sigra dipademken, kerna marika poen lantas mengarti jang marika haroes menghadepin moesoeh dari tingkatan apa.

Hongyang Boe-so Yo Tiong ada djadi orang jang pertama telah memboeroe ka pintoe dan teroes berlaloë, See Tjong Pin memboentoetin di belakangnya ; dan Tjio In Teng adalah jang katiga ; tjoema Ham Siao Tjoan saorang telah menerobos kaloewar dari djendela belakang lantas lompat naek ka atas genteng.

See Tjong Pin bertiga begitoe lekas soedah ada di loewar kamar sigra marika bagi ka arah tiga djoeroesan oentoek menjelidikin, tetapi ternjata semoewa nihil.

„Bagimanapoén ia tida aken mampoe lolos dari ini Pek-lauw-teng,” tereak See Tjong Pin pada ka-

wannja jang baroe koempoel, „marilah kita orang koeroeng dari ampat pendjoeroe itoe oetan-kajoe dan tjari padanja.”

Adalah See Tjong Pin telah madjoe ka djoeroesan depan, Ham Siao Tjoan ka belakang roemah, Tjio In Teng berbalik menoedjoe ka dalem roemah, lompat meliwinati tembok dan teroes berlaloe, sedeng Yo Tiong dari tembok barat telah memoeterin di sapoeternja itoe paseban.

Di antara marika adalah Ham Siao Tjoan jang paling gesit dan gerakannja tjepet; dari belakang roemahnja See Tjong Pin tida djaoeh soedah bisa terliat bagian aer dan di sitoe poen tida ada laen-laen roemah, maka ialah jang paling doeloe telah masoek ka dalem itoe oetan-kajoe. Begitoe lekas ia baroe masoek beberapa poeloeh tindak ka dalem oetan itoe, tiba-tiba ia dapet denger soewara tertawa jang dateng dari atas poehoen dengen samar-samar; tentoe sadja Ham Siao Tjoan djadi terkedjoet dan brentiken tindakannja. Memang Ham Siao Tjoan ada satoe orang jang tjerdk dan banjak akalnya, maka ia tetep berlari ka depan seperti orang jang tida denger soewara tadi tetapi sasoedah ia liwatin tiga poehoen lagi, maka dengen mendadak ia poeter badannja dan dengen berbareng tangan kanannja melemparken doewa boetir Yan Yang Tan ka arah poehoen jang ia denger soewara tadi. Gerakan tangannja soenggoeh haroes dipoedji ada sanget sebet, djoega itoe matjem sendjata resia maski larinja pesat tetapi tjoema mengeloewarin soewara jang aloes; Yan Yang Tan tadi menerobos ka bagian tjabang-tjabang jang lebet, soewara jang terdenger oleh kerina patahnja tjabang-tjabang poehoen menjataken jang ia telah menjerang kosong. Dan ia poen soedah pikir tida maoe masoek terlebih djaoeh ka dalem itoe oetan dan koepingnja dipasang awas-awas dan ta-

ngannja menghoenoes golok Kwie-tao-to, sebaliknya ia melompat ka poehoen tadi oentoek mengedjar orang jang bersemboeni itoe. Oleh kerna Ham Siao Tjoan pikir itoe orang tentoe belon bisa pergi ka mana-mana. Baroe sadja badannja terpisa dari moeka boemi bebrapa kaki mendadak dari atas ada menjamber sebatang tjabang Siong kira-kira sebesar lengen anak-anak penoeh dengan doeri menimpah kapalanja. Ia dengen sebet mengelit ka sebelah kiri; betoel itoe batang tida kena menimpah kapalanja, tetapi batang jang ketjil dengen doeri-doeri jang tadjem semoewa soedah menempel di saloeroeh badannja. Djoestroe Ham Siao Tjoan selagi berada dalem keadahan demikian dari atas poehoen telah terdenger poela soewara tertawa dan berbareng dengan itoe satoe bajangan item telah berkelebat menojoe ka djoeroesan roemahnja See Tjong Pin — tjepetnja sebagi kilat.

Ham Siao Tjoan telah tida perdoeliken lagi rasa sakitnya dari doeri-doeri jg. masih menoesoek di badannja, mengeloewarken sakoewat tenaganja boewat mengedjer. Marika tjoema berpisahan di antara djarak 3 sampe 4 toembak djaoehnja; itoe bajangan item kaliatan telah meliwinati tembok dan masoek ka dalem, kamoedian memoeter menoedjoe ka djoeroesan barat; Ham Siao Tjoan mengedjer teroes dan menjegat di podjok tembok barat, tapi bajangan item tadi soedah mengilang tida katahoean ka mana perginja.

Si Alap-alap malem Ham Siao Tjoan sasoenggoehnja soedah boekan sedikit tahoen berkoeliling dalem kalangan Kang-ouw dan ia poen tersohor dengan kasebetan dan katjepetan larinja, tetapi pada malem itoe ia tida bisa tida di dalem hatinja mengakoe jang ia soedah dipetjoendangin oleh moesohnja, walau poen ia merasa gemes dan maloe. Ia teroes memoe-

terin itoe tembokan dan koetika ia baroe maoe mem-biloek, tiba-tiba ia kesomplokan dengen Yo Boe-soe jang memang lagi sedeng asik menjelidikin djoega. Ham Siao Tjoan soedah tentoe tida brani tjeritaken prihal apa jang baroesan ia soedah alamin. Dan se-baliknya ia membohong jang ia soedah preksa di belakang itoe roemah dan tida kedapetan apa-apa.

„See Soehoe jang telah memboeroe di bagian de-pan barangkali ia dapetken apa-apa, marilah kita pergi ka depan boeat meliat,” saoet Yo Tiong.

Marika berdoewa djalan menoedjoe ka depan dan Ham Siao Tjoan dengan diam-diam soedah selesei menjaboetken doeri-doeri jang menantjep di badan-nya.

Sesampenja di depan itoe roemah marika liat See Tjong Pin sedeng berdiri di tengah-tengah grom-bolan poehoen-poehoen; dan begitoe See Tjong Pin meliat marika mendatengin seraja berkata: „Apa jang kita orang telah alamken ini malem, soenggoeh-soenggoeh sanget mengheranken. Kedatengannja itoe orang soedah tentoe boekan dengen maksoed baek, tapi heran ia tida maoe menoendjoekin romannja, inilah jang membikin djadi soesah dimengarti! Apakah ia ada dari kalangan Liok Lim sendiri jang soedah sengadja dateng boeat mempermaenken kita. Akoe soedah tinggal di ini Pek-lauw-teng tida sedikit tahoen dan selamanja itoe belon pernah akoe tida menerima pada kawan-kawan jang soedah dateng maski dari tjabang apa poen; tapi djika perboewatan jang seperti begini soedah tentoe tida bisa dipersalah-ken akoe jang djadi toean roemah.”

„Ini matjem manoesia jang telah oempetken ka-pala dan boentoetnja tida haroes dianggep satoe ka-wan jang baek,” kata Ham Siao Tjoan dengan pe-nasaran, mendongkol dan marah. „Tida perloe kita moesti ladenin padanja, tida ada harganja boewat-

kita menghamboerken tempo oentoek mentjari.”

See Tjong Pin poen tida mengoesoelin poela boewat mentjari, dan telah menoeroetin sadja jang laenlaen menoedjoe poelang.

Sedari bermoela marika memang telah kaloewar dengen berlompat meliwatin tembokan, maka itoe koetika marika poelang kombali semoewa pintoe masih tertotoeop rapet seperti sebagimana asalnja, maka marika poen haroes berlompat poela melaloein tembok boewat masoek ka dalem.

Ham Siao Tjoan adalah orang jang pertama telah lompat ka atas tembok, baroe sadja kakinja mengindjek woewoengan tembok dan aken melajang teroes ka dalem mendadak kadengeran ia berseroe, „Aja!” Berbareng dengen itoe ia boewang badannja ka belakang dan di itoe sa’at djoega lantas terdenger satoe soewara sebagi seroepa benda logam telah membenetoer tembok. Dengan sakedjeb sadja See Tjong Pin dan Yo Tiong soedah mengikoetin lompat ka atas tembok dan sembari mendekem, „Ham Soehoe, apakah baroesan kaoe boekannja soedah diserang dengan sendjata resia?” menanja Yo Tiong. Ham Siao Tjoan tida bisa kasi penjaoetan apa-apa, melaenken ia lajangin badannja ka dalem dan kadoewa kawannja poen mengikoetin dari belakang. Dan marika poen mengarti jang Ham Siao Tjoan berada dalem keadahan katjele dan kamekmek, dan marika poen tida melandjoetken pertanjaannja lagi; malah See Tjong Pin sengadja egosin pertanjaan: „Kenapa Tjio Soetee masih djoega belon kombali?.....” sabelon ia teroesken pertanjaan mendadak ia lompat ka depan dan baroe sadja ia sampe di depan djaro bamboe se-raja menolah ka belakang bilang: „Wah! Tjio Soetee telah poelang terlebih doeloe. Kaoe liat! Semoewa lampoe di dalem soedah terang.” Baroe sadja ia berbitjara sampe di sini mendadak dari atas tembok ada

lompat satoe orang jalah Tjo In Teng; maka See Tjong Pin poen mendjadi melengek seraja bilang: „Siapatah jang berada di dalem?”

Dari pedaleman tida terdenger penjaoetan apa-apa. Dengan sanget moerka See Tjong Pin telah dobrak itoe pintoe, lompat masoek ka dalem sambil sepasang tangannja dipalangin di depan dadanja boewat mendjaga kaloe-kaloe ada orang jang aken membokong dari dalem; tetapi ternjata di dalem poen kosong belaka. Tjoema di atas medja jang berdeketan dengan djendela ada satoe lampoe sedeng menjalah; marika jang bertiga poen soedah mengikoetin lompat ka dalem, dan marika meliat keadahan jang seperti itoe dengen berbareng bilang, „Baroelah ini malem kita betoel-betoel kena diakalin oleh laen orang,” dengan soewara jang sanget mendongkol dan tertjampoer rasa katjele, sambil goleng-golengken kapala marika samperin itoe medja dan ternjata di atasnya ada menggletak satoe soerat jang tintanja masih basah. Meliat begini marika sama sekali aer moekanja pada berobah seperti orang jang moerka tertambah maloe, dan boleh dibilang marika ada orang-orang jang soedah kawakan di kalangan Kang-ouw, tetapi malem ini soedah dipermaenken sampe sabegitoe roepa, maka dalem hatinja masing-masing poen merasa kagoem dengen ilmoenja sang moesoech itoe.

See Tjong Pin lantas djoempoet soerat tadi jang mengeletak di atas medja, seraja batja dan boenijnja ada seperti berikoet:

„Soedah sedari lama akoe mengatahoei jang Ngoin-pang-djit ada djadi orang satoe-satoenja dari kalangan Kang-ouw jang soedah mejakinken sendjata resia, Kim Boen Kiem tida mengenal kaloehoeran-nja sendjata itoe; dengen setjara membabi-boeta soedah terkena oleh tadjemnja sendjata terseboet, maka beginanatah ia bisa terloepoet dari kematian.

Ini matjem ilmoe jang sanget kedjem dan kedji, akoe inginlah aken itjipken rasanja. Apabila sampe bener-bener bisa menangin poela pada peladjaran Boe Lim jang pengabisan, itoelah tentoe aken mengidjinken kaoe oentoek mendjagoin teroes di itoe fabriek fabriek hingga riboean tahoen lamanja. Tjoema sadja Tjoe-bo-kim-so belon tentoe memberi idjin oentoe kaoe berpengharepan demikian adanja.”

Ngo-in-pang-djit See Tjong Pin satelah selesai membatja soerat tadi tampang moekanja lantas djadi berobah dan sigra berkata, „Soedahlah sekarang akoe mengarti jang akoe tjoema mempoenjai nama kosong sadja, dan moengkin ini kali akoe haroes mengorbanken djiwakoe. Tetapi terhadep itoe perkara jang soedah kedjadian, sasoenggoehnja akoe tida pernah berboewat berat sabelah atawa ada mengandoeng pikiran temaha; tjoema sanget menjesel jang iaorang telah sanget mendesek dan memaksa sehingga akoe moesti berboewat demikian. Kamoedian sasoedahnja lakoeken itoe perboewatan poen, akoe lantas mendapat kesan jang akoe haroes telen boeah jang getir dari perboewatankoe tempo akoe masih berada dalem kalangan Kang-ouw jang koerang baek.

Tjoema sadja terhadep orang jang telah tinggal-ken soerat ini, jaitoe Tjoe-bo-kim-so Tam Tjoe Sian, memang sedari doeloe akoe amat indahken padanja, oleh kerna namanja di kalangan Kang-ouw ada tersohor sekali dan adalah satoe Enghiong jang sedjati. Tetapi sanget menjesel jang ia telah hadiaken akoe sepoetjoek soerat ini, telah menandaken jang ia ada saorang jang sanget sompong.

Akoe See Tjong Pin poen boekan satoe laki-laki jang gampang kena digertak dan lantas mengkeret hatinja. Djika terpaksa sampe masing-masing menggoenaken sendjatanja, sekalipoen iapoenja Tjoe-bo-kim-so jang memang belon ada tandingannja, akoe

poenja Ngo-in-pang-djit Liap-hoen-teng poen belon bisa dibilang tida bisa tandingin padanja."

Sasoedah itoe tiba-tiba terdenger oleh marika ada soewara memanggil-manggil jang dateng dari loewar djendela, soewaranja sanget aloes jang mana bisa dipastiken telah kaloewar dari moeloetnja saorang prampoewan; semoewa penerangan dalem itoe roemah dengen serentak telah mengalamin pemademan jang kadoewa kali. Di dalem hatinja See Tjong Pin menganggup bahwa dalem Pek-lauw-teng soedah merembes masoek tida tahoe bebrapa banjak moesoeh², dan ia poen soedah ambil katetepan oentoek berhadepan dengen siapa djoega, walaupoen sampe ia moesti korbanken djiwanja. Ia lantas boeka pintoe dengen satoe kali toelak dan berbareng lompat kaloewar ka pelataran.

Pada masa itoe, tetamoe jang dateng telah berlaloe mendjaoehin djendela kira-kira antara bebrapa kaki djaoehnja, dan berdiri di tempat terseboet. Ia ada memake pakean serba idjo begitoe kaen jang mengiket kapalanja; dari sinarnja remboelan poen bisa djoega terliat romannja dan pengawakannja, terbanding dengen Tam Swat Yong berbeda tida seberapa banjak, kira-kira beroesia 40 tahoen koerang lebih. Di belakangnya tergemblok satoe pedang dengen terhias oleh sepasang benang soetra item di gagangnya; kaliatannya soenggoeh angker dan agoeng adanja.

See Tjong Pin tida ajal lagi lantas membentak, „Akoe merasa bangga jang Pek-lauw-teng pada mallem ini soedah kadatengan satoe pentolan betina dari kalangan Kang-ouw, tetapi akoe tida tahoe kaoe ada hoeboengan apa dengen Tam Swat Yong jang sekarang brani belaken Kim Boen Kiem. Lekaslah kasi tahoe nama dan she-moe.”

Prampoewan tadi lantas moendoer berapa tindak dan senderken belakangnya ka podjokan tembok se-

raja bilang, „Apabila akoe tida terangken padamoe dari mana asal kadatengankoe, soedah tentoe kaoe tida aken diper ketahoei. Sia-sia nama kaoe jang begitoe tersohor di kalangan Kang-ouw, dan kaoe sampe ini waktoe masih belon mendoesin terhadep perboewatanmoe. Akoe poenja kadatengan memang oentoek Kim Boen Kiem dan Tam Swat Yong, maka apabila boekannja satoe familie jang berdeketan darah-dagingnya, siapatah soedi boewat belaken pada-nja?”

„Akoe telah dateng dari Tjip-san-tjhung; akoe se-nagadja dateng boewat berkenalan dengen Ngo-in-pang-djit jang soedah bikin tergeler seantero Kang-ouw dengen kepandeannja.”

„Ha-ha-ha!” See Tjong Pin tertawa sambil ber-kata: „Sekarang akoe soedah taoe jang kaoe ini ada Tjie-hiong-piao Tam Swat Yong poenja soedara prampoewan!”

Memang sasoenggoehnja See Tjong Pin telah ke-nal namanja Tam Tjoe Sian di kalangan Kang-ouw, tetapi tentang roemah tangganja ia sanget samar. Maka djoega oleh kerna ia menampak dengen jang berhadepan padanja itoe, menoeroet doegahan oe-moer dan pengawakannja ada pantes sekali djadi soedaranja.

Tetapi perkatahan See Tjong Pin tadi telah me-nimboelken itoe djago-betina poenja moerka dan membentak, „Hei! See Tjong Pin, toewa bangka mata lolong. Siapatah soedaranja Tam Swat Yong. Akoe adalah iboenja — Tjin Liong Tjeng adalah namakoe.”

Di itoe sa'at ampir sadja Tjin Liong Tjeng tida kaboberoe oetjapken perkatahan jang pengabisan tadi, tiba-tiba dari djoeroesan belakangnya ada sioeran angin, begitoe ia melirik, ternjata ada satoe orang dengen memegang Kwie-tao-to di sabelah tangannja

sambil ajoenken itoe dan membatjok. Tjin Liong Tjeng dengen sebet soedah melangkah setindak ka sabelah kiri; dan dengen begitoe lemes seperti oeler ia balikin badannja, hingga itoe batjokan telah liwat dengen tida berhasil. Itoe koetika Tjin Liong Tjeng dengen tjeplet sebagi kilat, angsoerken tangan kirinja menjamber ka depan dengen doewa djeridji tangan dan teloendjoeknja ditoedjoeken ka bagian tenggorokan, oentoek membikin tamat lawanannja dengan sekali goes.....

Jang membokong itoe adalah Ham Siao Tjoan, ia poen mengarti jang serangan itoe sanget lihay; ia lantas dongakin ka belakang sedikit kapalanja sambil berbareng robah kadoedoekannja. Tapi apa tjlaka begitoe tangan kanannja kena dikelit oleh Ham Siao Tjoan, dan berbareng dengen ditariknja tangan kanan tadi, iapoenja tangan kiri telah menjamber poela ka Ham Siao Tjoan poenja katek jang sabelah kiri. Ini gerakan telah didjalanken dengen katjepetan dan kasebetan jang loewar biasa. Ham Siao Tjoan jang baroesan telah alamken doewa serangan dengen berroentoen, walaupoen tangannja memegang sendjata, tetapi sia-sia sadja. Djalan satoe-satoenja jang ia bisa lolosken dirinja dari bahaja, tida laen, ia lantas goenaken tenaga kakinja berlompat ka belakang; tapi apa latjoer koetika baroe sadja kakinja terangkat dari tanah, sabelah tangannja Tjin Liong Tjeng telah berbareng dateng menjamber, dan kena telak di bagian lamboengnja. Sekalipoen serangan ini tida membahajaken djiwanja, tetapi ia soedah terplanting dan kapalanja kabentoer dengen tembok jang deket djendela.

Di itoe sa'at djoega dengen mendadak satoe batang toja soedah menjamber dari pinggir. Dengan lantas Tjin Liong Tjeng mengelit sedikit ka pinggir, dan itoe toja besi telah liwat ka bawah di depan moeka-

nja dan berbareng iapoenja tangan kanan telah dateng menghantem lengen lawanannja; djoestroe ia ini adalah Tjio In Teng. Ia dapet kenjatahan serangannja tida berhasil dan begitoe sebet tangan lawanannja soedah lantas poekoe lengennja, maka dengen tjepet ia telah lompat moendoer sambil sapoeken tojanja jang satoe lagi ka bawah.

Sendjata sematjem itoe poen sasoenggoehnja ada sanget berbahaja; tapi boewat Tjin Liong Tjeng ia sama sekali tida ambil perhatian. Dengan satoe kali lompat, njata itoe toja soedah kena disapoe kosong. Dalem pikirannja Tjio In Teng, apabila ini satoe prampoewan tida bisa dikalahken, pastilah namanja aken terhina bener-bener di kalangan Kangouw, maka dengen soemanget jang bernjalah-njalah ia angsoerken sepasang tojanja ka depan dengen berbareng, sedeng soewara berkerintjingannja itoe tjintjin wadja jang ada tertjantoe di atas toja ternjata sanget menjeremken pendengeran. Tjin Liong Tjeng jang toeboehnja soedah terapit oleh itoe sepasang toja dengen moedah soedah kelit dan tangkis kadoewa sendjata itoe berbareng ia serang bagian oeloe hati lawanannja.

Tjin Liong Tjeng poenja kapandean bersilat memang sanget tinggi disertaken dengen kagesitan dan kasebetan jang loewar biasa, sekali poen Tjio In Teng menjerang sampe sepoeloeh djoeroes, sebaliknya djadi ia jang kena dipengaroehin oleh seranganja Tjin Liong Tjeng.

Tjio In Teng jang telah djadi semangkin marah, ia sigra goenaken ilmoe „Hoa Tjoen Pat Ta”, poeterken sapasang sendjatanja dan selaloe toeker-toeker tjara dan djoeroesannja hingga anem belas matjem serangan, kerna ia berpengharepan ingin bikin roeboeh moesoehnja dengen lantas. Tapi siapa njana jang itoe Enghiong betina masih rasaken terlaloe

banjak keringanan boewat lajanin padanja. Kerna bāroe sadja Tjio In Teng selessei dengen serangan jang ka ampat dan hendak moelai pada jang ka lima, jaitoe jang dinamaken Ouw Liong Tjoan Wie, dengen gegamannja sapasang sendjatanja disamberken dari bawah ka samping dengen membelakangin badan; Tjin Liong Tjeng lantas endjot badannja melolpat ka atas, Tjio In Teng meliat serangannja gagal lantas tjari gegamannja dengen sebet poeter badannja ka kiri sembari sapoe lagi kakinja Tjin Liong Tjeng; dan dengen sakedjep kadoewa tojanja soedah sampe di kakinja Tjin Liong Tjeng dan ia poen tida ajal lagi berlompat ka atas meliwinati kapalanja Tjio In Teng, dengen berbareng menggoenaken tipoe „Hong-Hong-Tian-Tjie” dengen kadoewa tangannja memoekoel emboen-emboenannja Tjio In Teng. Apa tjlaka ia soedah tida bisa berkelit dan mengenaken dengen djitoe, maka ia dengen terpelanting djato doedoek di atas boemi.

Yo Tiong meliat demikian lantas berlompat dateng bangoe^{ken} padanja sambil menanja, „Tjio Soeheng begimanatah kae?”

„Tida sedikit tahoen telah akoe berkoeliling dalem kalangan Kang-ouw, tapi achirnya sekarang djato-tjoema oleh tangannja satoe prampoewan, soenggoeh sanget meⁿgetjiwaken,” saoet Tjio In Teng sambil goleng-goleng kapalanja seraja berbangkit dari tanah.

Tapi oleh kerna Tjin Liong Tjeng poen ketahoei jang ia itoe boekan toean roemah, maka djoega ia soedah tida binasaken padanja, biarken sadja ia pergi kabober.

Sakoetika itoe Yo Tiong telah saksiken beroentoendoewa kawannja soedah kena dikalahken, maka dengen tida ajal lagi ia lompat ka depan Tjin Liong Tjeng seraja bilang, „Li-Enghiong dari Tjip-santhung sasoenggoehnja haroes dipoedji; akoe orang

she Yo moehoenken pengadjaranmoe boewat berapa djoeroes."

Tatkala baroe sadja Yo Tiong bitjara habis perkatahannja, mendadak dari atas tembok jang sabelah barat terdenger satoe soewara tereakan jang agak keras dan bilang, „Hei! Orang she See, sia-sia kaoe mendjagoin di kalangan Kang-ouw, ini malem perboewatanmoe soenggoeh haroes ditjela dan pentjоet, lebih baek kaoe lekas pergi dari Pek-lauw-teng, djangan mengetjiwaken pada laen orang.”

Menoeroet pikirannja See Tjong Pin, semoewa jang dateng padanja ada kawan²nja dari kalangan Kang-ouw, merasa dirinja sendiri ada toewan roemah, manakah bisa tida mengalah boewat marika jg. maoe toeroen tangan terlebih doeloe, tiba-tiba ada orang jang djengkin padanja, maka ia sanget moerka dan baroe sadja ia maoe lompat ka atas, ternjata itoe orang telah toeroen ka dalem pekarangan terlebih doeloe; Ngo-in-pang-djit See Tjong Pin poen soedah begitoe sebet menghamperin padanja sampe tjoema di antara djarak bebrapa tindak djaoehnja.

Apa jang bisa terliat dari itoe orang jang baroe pertoendjoekin romannja, ia berbadan tinggi anem kaki lebih, moekanja merah bersinar oengoe, alisnya pandjang dan kadoewa matanja bersorot tadjem, disertain dengen koemis dan djenggot jang pandjang. Memake badjoe warna biroe dengen kantjing tembagga jang besar-besar, kaos-kakinja jang poetih terboengkoes dengen sepatoe Hok-djie ia berdiri dengen djedjek dan tampangnya sanget garang. Dengan tiba-tiba ia angkat tangannja menjodja pada See Tjong Pin sambil berkata, „Kawankoe, kaoe adalah toewannja dari ini Pek-lauw-teng, djoega adalah satoe Enghiong jg. di masa sapoeloeh tahoen jg. laloe telah mendjagoin di kalangan Kang-ouw; tjoema sadja ini malem poenja perboewatan akoe ada sedikit

tida hargaken!"

See Tjong Pin dari bermoela memang soedah mendongkol dipermaenken begitoe roepa, maka sekarang mendenger poela djengekan jang begitoe poenja pedes, dari itoe ia ada sanget moerka. Tapi itoe koetika ia telah tindes amarahnja sebrapa bisa dan bilang, „Sobat! akoe See Tjong Pin sepandjang hidoepnja belon pernah bertemoe dengan kaoe, mendadak kaoe telah dateng ka Pek-lauw-teng dan tiba-tiba lantas kaoe oepatjatji padakoe dan kaoe poen belon kasi tahoe kaoe poenja she dan nama. Apakah akoe See Tjong Pin ada berboewat kesalahan apa dengan kaoe? Hareplah kaoe soeka tjeritaken ini semoewa pada-koe."

Orang itoe sasoenggoehnja adalah Tjoe-bo-kim-so Tam Tjoe Sian, jang mana lantas sadja ia tertawa seraja bilang, „Sobat, akoe ini sabetoelnja tjoema ada djadi salah satoe Boe-beng-siao-tjoet dari kalan-gen Boe-lim, sasoenggoehnja tida ada harga boewat akoe koendjoengin Pek-lauw-teng, tapi oleh kerna kadatengankoe ada oentoek kaoe, mana boleh akoe tida kasiken keterangan sadjelasnja.

Beberapa koetika kemarihin akoe ada tinggal di Houw-gee-san Tjip-san-tjhung, akoe she Tam, namakoe Tjoe Sian."

„Pantaslah ada sademikian keangkerannja, kiranya inilah ada Tjoe-bo-kim-so Tam Lo-engthiong, ma'af-kenlah jang akoe mempoenjain mata tida berminjak. Tetapi sebaliknya akoe telah dapet pikiran, Lo-engthiong poenja kadatengan ini tentoe adalah oentoek memereksa kasalahankoe, baek djoega akoe See Tjong Pin, telah mendoegah terlebih doeloe.

Tjoe ma sadja akoe sebagai satoe Ho-han soedah tentoe tida bisa tida menoenggoe kadatengan Lo-engthiong."

„See Tjong Pin, toenda sadja doeloe perkara jang

akce maoe preksa itoe, dan lebih doeloe oeroes sadja hal-hal jang ada di depan mata." Sambil berbitjara tangannja menoendjoek pada Tjin Liong Tjeng. Koetika itoe Tjin Liong Tjeng dan Yo Tiong sama-sama soedah tida djadi berdjaoehan.

„Inilah istrikoe Tjin Liong Tjeng," Tam Tjoe Sian samboeng perkatahannja, „ia poenja kadatengan ka Pek-lauw-teng poen adalah oentoek poetrinja jg. soedah menderita bahaja sanget heibat, sekalian ingin meliat See Losoe poenja kapandean sampe di mana. Tapi kadatengan ia ka sini ada di loewar tahoekoe. Ada di loewar doegahankoe poela, bahwa kaoe orang-orang dari kalangan Kang-ouw jang telah begitoe ternama; dengen tjoema berhadepan dengen satoe wanita soedah moesti goenaken tipoe pertempoeran jang berganti-gantian. Dan begitoe djoega terhadep poetrikoe jang tida berdaja apa-apa kaoe soedah paska ia dengen kakerasan boewat moesti tinggalken roemah tangganja dari Yangtjoe. Ini perboewatan telah djadi pasti tida bisa disangkal lagi adalah djadi perboewatan kaoe — orang she See. Sebaliknya kaoe poenja perboewatan terhadep Kim Boen Kiem memang ada sampe tjoekoep kedjem dan boewas, tetapi itoe perkara masih ada bagian-bagian jang bisa dima'afken. Tjoema terhadep perboewatan-perboewatan kaoe ini malem jang akoe liat dengen matakoe sendiri, inilah sasoenggoehnja jang soedah membikin akoe tida poewas. Dari itoe djoega sebaliknya maka akoe ingin dengen berhadepan memoehoen kaoe poenja pengadjaran."

„Tam Lo-soe, kaoe poenja perkatahan terang sekali djadi salah," saoet See Tjong Pin, „dalem kalangan Kang-ouw adalah kapandean jang membedaken kagagahan dan kalemahan, tapi tida membedaken lelaki atawa prampoewan.

Samentara soedara-soedarakoe memang soedah

lebih doeloe dapt tahoe bahwa istrimoe ada dari kalangan jang ternama, sedeng kадатengannja ka Peklauw-teng soedah terang ada mengandoeng maksoed-maksoed jang tida baek, dari itoe tjara bagimanatah akoe bisa tida samboet kадатengannja."

„Djikaloe demikian, baek kita bitjaraken halnja Kim Boen Kiem,” kata Tam Tjoe Sian sambil tertawa ewa, „apabila dibilitjaraken prihal kapandean silat dan bandingken dengen See Lo-soe poenja kapandean, teranglah ia tjoema sebagai satoe botjah jang masih baoe poepoek; sekalipoen betoel ia telah menerima kapandean dari laloehoernja, toch akoe tida bisa toendjoeken jg. mana ada Goeroenja. Tetapi apabila kaoe bisa berpaling sadja sedikit padakoe, soedah tentoe kaoe See Losoe poen haroes berboewat lebih banjak kasabaran terhadep itoe botja, dan tida moesti sampe menggoenaken Ngo-in-pang-djit Liap-hoenteng boewat ambil djiwanja. Orang she See, kaoe soedah begitoe brani mendjalanken satoe perboewatan jang demikian tida mengenal prikemanoesiaan, inilah disebabken jang mengira di kalangan Kangouw soedah tida ada jang bisa tandingin kaoe poenja sendjata resia itoe.

Tam Tjoe Sian memang ada satoe orang jang tida terpeladjar, djoega akoe dateng kasini boekan bermaksoed boewat membales sakit hati dari mantoe-koe, akoe tjoema sengadja dateng oentoek moehoen beladjar kenal sampe di mana kaoe poenja sendjata resia poenja kalihay-an adanja.”

„Djikaloe kaoe bilang begitoe, Tam Losoe, akoe See Tjong Pin poen djadi merasa tida poewas, apa bisa djadi satoe Satria jang tertoewa serta telah mengendoerken diri seperti Tam Losoe nanti tida mengindahken pada keadilan dan kabeneran?” saoet See Tjong Pin.

„Menoeroet akoe poenja pendapetan, di ini djeman

jang soedah kaloet dan katjau; toelen dan palsoe soedah tida di-endahken, kabeneran dan kadjahatan soedah tida ada satoe orang jang maoe bitjaraken, siapa jang lebih gagah ialah jang menang dan jang lemah tentoe aken mendjadi korban, menoeroet oe-koeran kepandean silat boewat menetepken tingkatan atas atawa bawah.

Kaoe soedah prentah moerid-moeridmoe boewat mendjagoin di antara fabriek-fabriek tenoen di kota Yangtjioe, jaitoe jang memake merk Hin Liong; Fabriek tenoen Lo Boen Kie jang sasoenggoehnja adalah fabriek jang tertoewa di antaranja, hingga sampe moesti mengalamin nasib kamoesna'an. Orang-nja dan harta bandanja poen abis berantakan. Kaoe liat ini sama sekali, apakah kaoe masih ada itoe moeka boewat maoe bitjaraken tjengli.

Di antara kaoe dan akoe, malem ini lebih baek kita orang lakoeken satoe pertjobahan; apabila kamoedian ternjata betoel-betoel jang kaoe poenja Ngo-in-pang-djit Liap-hoen-teng masih mampoeh petjoendangken akoe, orang she See, bisa dipastiken di hari-hari kamoedian tentoe tida ada satoe manoesia jang brani aken koendjoengin kaoe," menjaoet Tam Tjoe Sian jang soedah mendjadi gemes.

Itoe koetika sabetoelnja See Tjong Pin soedah rasaken ampir tida koewat boewat tahan amarahnjia, tapi bahkan kaoeloengannja, ia masih paksaken berbitjara dengen mesem dan bilang, „Tam Losoe, kaoe poenja omongan tadi soenggoeh ada sanget diloewar dari akoe poenja pikiran. Kaoe soedah desek soepaja akoe tida perdoeliken lagi bener atawa salah, dan langgar sadja apa jang lempeng atawa bengkok; lebih djaoeh kaoe inginken See Tjong Pin menoendoek. Roepa-roepanja kaoe Tam Losoe, soedah tida bisa briken ma'af lagi padakoe. Apatah satoe orang jang soedah beroemoer begini toewa seperti akoe masih

bisa makan berapa banjak oemoer lagi boewat hidoep di doenia ini?

Tapi djika betoel-betoel terboekti jang ini malem akoe sampe goegoer dalem tanganmoe, itoelah boleh dibilang ada tjoekoep berharga."

„See Tjong Pin, kita orang bersama-sama ada dari golongan Kang-ouw, sasoewatoe perboewatan haroes dilakoeken dengen lantas dan goembirah, djangalang kalowarken lagi perkatahan-perkatahan jg. seperti begitoe," berkata Tam Tjoe Sian dengen soewara jg. kerèn, sambil kadoewa matanja terboeka lebih besar dan boender, menandaken jang iapoenja amarah telah sampe pada poentjaknja. Pada itoe koetika Tam Tjoe Sian soedah tida kasiken koetika pada See Tjong Pin boewat bitjara lebih djaoeh; lantas ia pasang bhesinja dengen tegoe, dan moelain boeka gerakannya.

See Tjong Pin poen itoe sa'at soedah tida bisa berboewat laen. Ia menoleh pada kawan-kawannja, djoega tida bisa diharep ada jang aken mampoe berboewat apa-apa lagi, maka ia tjoema menjaoet: „Djikaloe sampe soedah kadjadian begini roepa, baeklah akoe melajanin sadja.”

Tam Tjoe Sian telah madjoeken iapoenja ilmoe Ko-yong-twa-kioe-tjioe jang ia telah pahamken lebih dari doewa poeloeh tahoen lamanja; sedeng See Tjong Pin soedah samboet itoe dengen ilmoe Tjait-tjioe-hwat oentoek trima serangannja itoe Lo-Eng-hiong.

Begitoe marika berdoewa beradoe tangan, bisa diliat dengen njata jang oemoernja masing-masing tida berbeda djaoeh, tapi dedekan badannja, jang satoe koeroes kering serta ketjil, dan jang satoe lagi tinggi besar serta gagah. Doewa-doewa poenja ilmoe silat masing-masing ada kebaekan sendiri; tapi kegaiban dari ilmoe Noei-kang jang Tjoe-bo-kim-so telah da-

petken dari kejakinan ja dalem ampir doewa poeloeh tahoen, itoe ilmoe djika digoenaken adalah bisa membahajaken pada lawanannja dengan tjoema memoe-koel oedara kosong sadja. See Tjong Pin jang melajanin baroe sadja tiga djoeroes, lantas ia soedah bisa pastiken jang ia boekan ada tandingannja Tam Tjoe Sian. Tetapi keadahan soedah mendjadi kasep, tentoe sekali ia tida boleh sangsi-sangsi lagi, me-laenken ia kaloewarken kepandeannja jang ia soedah peladjarken saoemoer hidoeprja. Tam Tjoe Sian poenja poekoelan menjamber angin ada begitoe heibat dan santer; setindak atawa sadjoeroes dengan tentoe serta kalm ia ladenin lawanannja, jang se-nantiasa berobah-robah dan toekar menoekar tjomak dan bentoeknja dari poekoelannja.

Tiba-tiba See Tjong Pin telah bergerak madjoe kadepan mendeketin lawanannja, berbareng kadoewa tangannja disodokin ka depan dadanja Tam Tjoe Sian, dengan begitoe ia soedah goenaken ilmoe serangan berisi dan kosong dengan berbareng. Tam Tjoe Sian menangkis dan singkirken itoe kadoewa tangan ka samping, dalem sekedjep sadja lantas ternjata jang bentoeknja serangan itoe djadi berobah laen matjem. Tam Tjoe Sian jang memangnja soedah ketahoei terlebih doeloe, maka ia sengadja tida goebris datengnja itoe sepasang tangan, hingga oe-djoeng djarinja soedah moelain mengenaken bagian dadanja; dengan tjara sanget sebet dan dengan mendadak kadoewa tangannja dari atas telah menjamber ka bawah dengan djari-djarinja ditoendoekin ka bawah, sambil selipken itoe kadoewa tangan ka tengah-tengah kadoewa bahoe lawanannja dan lantas peng-kangken ka kiri dan kanan. Tetapi See Tjong Pin poen lantas rebahken sedikit badannja sambil dimiringken ka kiri, hingga poendaknja jang kanan sam-pe berhadepan dengan Tam Tjoe Sian poenja poen-

dak jang kanan djoega, dan dengen sanget sebet ia menendang dengen oedjoeng kaki kanan dan tatkala oedjoeng kakinja soedah berada di bagian peroetnja Tam Tjoe Sian; ini satoe serangan ia telah lakoeken dengen sebet dan tjepej jang sanget loewar biasa.

Tapi siapa njana jang Tjoe-bo-kim-so poen soedah bersedia terlebih siang. Ia lantas sapoeken kaki kanannja ka kiri, berbareng kaki kirinja diangkat sedikit ka atas dengen tjoema oedjoengnya kaki sadja jang mengindjek tanah, hingga badannja poen djadi toeroet berpoeter, dan begitoe lekas badannja berbalik kombali, kadoewa tangannja soedah terpentang, berbareng tangan kirinja lantas menjamber ka kaki kirinja See Tjong Pin. Apabila itoe satoe djoeroes bisa mengenaken dengen djitoe, pastilah kakinja See Tjong Pin tentoe patah. Tapi seperti tadi soedah dibilang jang See Tjong Pin telah menendang dengen kosong, sigra ia rebahken badannja lebih rendah, sambil kaki kirinja menjabet dengen sape-noeh tenaga dan begitoe sebet poen ditarik kombali, hingga djadi tjoema sebagian tjelananja sadja jang kasamber oleh tangan njana Tam Tjoe Sian. Boekan sadja See Tjong Pin poenja badjoe djadi sobek se-dengan badannja poen ikoet kanjoeknjoek; begitoe lekas oedjoeng djarinja mengenain tanah lantas ia endjot badannja dan lompat bangoen kombali sambil berkata, „Tam Losoe poenja ilmoe silat soenggoeh sanget tinggi, dan akoe sekarang menjerah kalah.”

Tjoe-bo-kim-so Tam Tjoe Sian meliat See Tjong Pin maoe kabober, lantas ia berlompat menoebroek padanja seraja membentak, „Hei orang she See! kaoe soenggoeh tida pandeng mata padakoe, kenapa sabelon kaoe goenaken kaoe poenja sendjata resia soedah maoe menjerah?”

Apa jang terdjadi di itoe malem; sekalipoen Tjin Lieng Tjeng soedah mendjadi heran, sebab sepan-

djang ia tahoe jang Tam Tjoe Sian adalah saorang jang paling endahken peradatan di kalangan Kang-ouw, dan dia poenja sifat berkorban poen melebih-ken laen-laen orang; maskipoen ia kaliatannja dari loewar ada seperti orang jang angkoeh dan kedjem, tetapi sasoenggoehnja ia adalah satoe satria jang sanget bidjaksana.

See Tjong Pin sigra balikin badan, dan berlompat mendjaoehin sambil berseroeh, „Sobat lawas! Akoe orang she See soedah mengakoe kalah, djoega tida ada ingetan terbitken permoesoehan sampe toeroen-menoeroen, kenapakah kaoe soedah mendesek sampe sanget katerlaloean.”

Pada itoe saat ada satoe orang tiba-tiba lompat toeroen dari tembok sabelah barat sambil berkata:

„Kaoe tida maoe bikin permoesoehan boewat laen toeroenan, tetapi toch kaoe haroes bikin beres peri-toenganmoe jang kaoe soedah berboewat pada ini djaman djoega. Ajah! Berhati-hatilah dengen iapoenja sendjata-resia.”

Orang jang berbitjara itoe boekan sadja telah me-nagatken See Tjong Pin, sedeng Tam Tjoe Sian poen soedah djadi terprandjat, dan lantas ia brentiken tindakannja; kamoedian ternjata boekan laen jaitoe Tjie-hiong-piao Tam Swat Yong, maka tida ajal lagi Tam Tjoe Sian lantas membentak: „Lekas moendoer! Kaoe djangan tjampoer oeroesankoe, Nanti akoe jang beresken peritoengannja jang bersangkoetan dengen kaoe.”

See Tjong Pin sambil lari telah memoeterin itoe paseban satoe poeteran, tetapi Tam Tjoe Sian tida sekali maoe lepasken padanja. See Tjong Pin oleh kerna soedah ambil katetepan tida ingin memper-pandjang permoesoehan itoe, maka dengen tiba-tiba ia lompat ka atas dan meliwinati pager bamboe, sam-bil balikin badannja berpaling ka belakang ia ber-

kata: „Sobat! Kaoe terlaloe mendesek padakoe. Ma'af akoe tida bisa ladenin kaoe terlebih djaoeh.“ Sasoedah ia berbitjara begitoe lantas kentjengin tindakannja maboer menoedjoe ka loewar tembokan.

„Maskipoen kaoe terbang sampe ka oedjoeng langit akoe djoega aken kedjer teroes, djika kaoe belon kaloewarken kaoe poenja sendjata resia,” menjaoet Tam Tjoe Sian seraja berlompat kaloewar menge-djer See Tjong Pin.

Kawan-kawannja See Tjong Pin dan Tjin Liang Tjeng dengen poetrinja poen tida banjak tjerita lagi lantas mengikoetin dari belakangnya.

See Tjong Pin soedah ambil katetepan boewat kabober dari Pek-lauw-teng, sasoedah ia lompatin tembok sabelah timoer lantas kentjengin tindakannja seperti terbang menoedjoe ka arah pinggir aer. Marika berkedjeran kira-kira ampir sampe di pinggir aer, Tam Tjoe Sian itoe masa berpikir apabila biarkan ia bisa kabober sampe di aer, achirnja soedah tentoe lebih soelit, maka ia lantas goenaken ilmoe mengentengin badan berlompat ka depan sebagai boeroeng walet menjamber aer, dengen moedah ia soedah ada di belakangnya See Tjong Pin. Sabegitoe lekas ia poenja kaki kiri mengindjek tanah telapakan tangan kanannja telah berbareng dipoeckoelken ka arah belakang See Tjong Pin. See Tjong Pin poen ada tjoekoep sebet, maka ia mentjelat ka depan. Maskipoen ia tida terkena oleh tangannja Tam Tjoe Sian tetapi ia soedah tida bisa terloepoet dan terkena oleh angin jang kaloewar dari poekoelan Tam Tjoe Sian tadi, dan ampir sadja ia djato terpelanting di tanah. Di itoe sa'at See Tjong Pin keretekin giginja seraja berpikir: Tam Tjoe Sian sasoenggoenja kaoelah jang soedah paksa akoe berboewat dosa; berbareng dengen itoe ia rabah-rabah kantongnja dan genggem sendjata-resianja, dan dengen sambil ban-

ting badannja ka belakang, tangannja menimpoek ka belakang seraja bertereak: „Kena!” Enam bidji pakoe Liap-hoen-teng soedah melesat dari tangannja, menjamber ka arah Tjoe-bo-kim-so Tam Tjoe Sian.

Sedari bermoela memang Tam Tjoe Sian meng-harep soepaja ia goenaken sendjata itoe, maka ia soedah mengedjer teroes-teroesan. Tam Tjoe Sian meliat moesoehnja melepaskan sendjata resianja, maka ia lantas banting dirinja ka belakang, begitoe lekas tangannja kena tanah lantas dengen berbareng tangan dan kakinja endjot badannja ka atas, maka sama djoega seperti sapotong papan melajang ka atas sampe satoe toembak lebih tingginya. Pada sa'at itoe Tjin Liong Tjeng soedah ada di sampingnya, sambil bertereak bilang: „Sendjata resia jang soenggoeh lihay!” Lantas ia timpoekin satengah losin Kim-tjie-pio-nja ka arah sendjata resianja See Tjong Pin. Trang! kadengeran beradoenja Kim-tjie-pio dengen Liap-hoen-teng; ternjata sendjata resianja See Tjong Pin soedah ada ampat jang djatoh.

Tam Tjoe Sian begitoe lekas iapoenja badan sampe di tanah lantas ia mentjelat lagi seraja bilang, „Sendjata jang sanget lihay! Betoel-betoel boekan poedjian kosong, sekarang sampelah akoe poenja giliran boewat memberi hormat.” Sambil ia memboeroe ka depan kira-kira doewa toembak djaoehnja, ia lantas bertereak: „Kena!” Dengan lantas dari tangan kanannja telah melesat doewa boetir Tjoe-bo-kim-so, jaitoe jang satoe besaran dan jang kadoewa ketjilan, dan jang besar lebih berat dan jang ketjil lebih enteng. Kim-so (teropong-tenoenan mas) jang ketjilan menjamber menoedjoe sanget lempeng pada otak belakangnya See Tjong Pin, dan jang besaran mengkoetin belakangan.

See Tjong Pin sasoedah dapet kenjataan bahwa serangannya loopoet sama sekali, ia djadi sanget ter-

prandjat dan keder, dan sebaliknya ia memastiken jang ia aken trima serangannja sendjata resia Tam Tjoe Sian. Doegahan itoe tida meleset, kerna baroe sadja ia lompat ka depan dan toeroen kombali, berbareng itoe kadoewa sendjata resianja Tam Tjoe Sian soedah tiba. See Tjong Pin memang sanget terkenal dengen iapoenna ilmoe mengelit jang sanget tjepeet dan sebet. Dari kanan ia lantas poeterken badannja ka belakang sambil miringken kapalanja ka sabelah kiri, Kim-so pertama soedah liwat di bagian tempat kosong. Tapi Kim-so jang kadoewa soedah menjoesoel telah tiba poela, menoedjoe lempeng ka arah oeloe-hatinja. See Tjong Pin dengen loewar biasa sebetnya goenaken seantero tenaga banting toeboenja ka samping kiri; hingga terhindarlah poela ia dari serangan Kim-so jang kadoewa.

Kamoedian dengen tjoema mengandel pada tenaga jang berada dipongkol bahoe tangannja, ia lantas melesat berbangkit dan berdiri lagi; tapi tida dinjanja dari Tam Tjoe Sian poenja tangan kiri berbareng di sa'at itoe djoega telah melesat poela doewa boetir Kim-so lagi. Ini kali menjambernya Kim-so jd. di-toedjoeken pada lamboeng kiri; dan jang besar di-toedjoeken ka lamboeng kanan, maka sekali poen terhadep orang jang bagimana tinggi ilmoe silatnja ia tida nanti bisa hindarken serangan ini. Tetapi See Tjong Pin sampe tjoekoep tjerdk dan gesit; ia toe-broekin badannja ka depan sampe di atas tanah dan itoe doewa Kim-so telah liwat poela, tetapi tida oe-roeng iapoenna badjoe di bagian lamboeng kiri dan kanan telah djadi bolong oleh kim-so tadi. See Tjong Pin telah mengaloewarken kringet dingin; dan Tam Tjoe Sian poen soedah sampe di hadepannja. Tetapi ini kali ia tida lantas boenoeh pada See Tjong Pin sebaliknya ia angkat kadoewa tangannja menjodja seraja bilang: „Sobat! Kita berdoewa ibarat 8 tail

sama dengen satengah kati jang bersama ilmoe silat-nja; tamatlah perklaian kita sampe di sini. Besok pagi akoe pergi ka kota Yangtjioe, di roemah makan Giok Hwa Kie mengoendang kaoe dan kawanmoe begitoe djoega Boe Lam Hin, boewat meroendingken hal-hal jang telah liwat dan jang aken dateng. Brani-kah kaoe boeat pergi?"

See Tjong Pin sambil tarik napasnya berkata: „Kaoe poenja Tjoe-bo-kim-so soedah tida bisa binasaken akoe, apatah lagi jang akoe masih takoetin? Akoe trima oendanganmoe itoe, dan kapan tempohnya?"

„Besok tengah hari akoe aken mengoendang dengan hormat," saoet Tam Tjoe Sian. Sakoetika itoe Tjin Liong Tjeng dan Tam Swat Yong telah tiba di sitoe. Tjin Liong Tjeng serahken ampat boetir Kim-so jang ia telah koempoelin. Tam Tjoe Sian sambil adjak istri dan poetrinja menoempang prahoe meninggalken Pek-lauw-teng.

Hari kadoewa telah tiba. Di itoe hari di roemah makan Giok Hoa Kie jang berdiri di antara djalanan prapatan tiga di tengah-tengah kota Yangtjioe, soedah sedari pagi hari sa'adanja penggawe di sitoe repot mengatoer. Semoewa tempat di atas lauwting soedah ada orang jang pak sama sekali. Semoewa penggawe dan pengoeroesnya merasa heran kerna jang mengoendang adalah orang dari laen tempat, sedeng dalem soerat oendangan ada tertulis fabriek tenoen Lo Boen Kie, tapi tida tertampak nama Toewan roemahinja. Fabriek tenoen jang pake nama itoe terang soedah lama telah brenti kerdja, sedeng orang jang ia oendang adalah Tauwkee dan pengoeroes-pengoeroes tinggi, Koewasa dan kassir dari fabriek tenoen Hin Liong; begitoe djoega Koewasa dan kassir dari fabriek tenoen Lo Boen Kie jang soedah brenti. Dan ada beberapa orang-orang terkamoeka

dari fabriek tenoen Lo Boen Kie jang soedah berenti. Dan ada bebrapa orang-orang terkamoeka dari kalangan dagang di kota itoe, seperti Tan Soe Sin, Tan Go Yo dan laen-laen bebrapa belas orang-orang lagi. Belakangan pengeroes dan penggawe Giok Hoa Kie baroe tahoe bahwa marika aken roendingken tentang peristiwa jang telah menggemparkan Yangtjioe jaitoe permoesoehan antara doewa fabriek tenoen Lo Boen Kie dan Hin Lieng.

Pada kira-kira ampir djam 10 pagi, Tam Tjoe Sian, jaitoe adalah orang jang mengoendang pesta itoe, istrinja dan Tam Swat Yong — poetrinja Tam Tjoe Sian begitoe djoega madjikan prampoewan dari fabriek tenoen Lo Boen Kie; sama sekali soedah berada di atas lauw teng roemah makan Giok Hoa Kie. Tida lama lagi para tetamoe dari kalangan dagang seperti Tan Soe Sin dan laen-laennja poen berteroet soedah tiba di toe roemah makan.

Tam Tjoe Sian dan poetrinja melajanin para tetamoenja dengen penoeh kahormatan. Tapi apabila ada salah satoe tetamoe jang madjoeken pertanjahan prihal oeroesan itoe fabriek tenoen, Tam Tjoe Sian selaloe beriken penjaoetan: „Harep Toewan soeka bersabar, sabentar djika eigenaar dan koewasanja dari fabriek tenoen soedah dateng, toewan poen aken mendjadi tahoe.”

Sedikit sa'at soedah liwat; kamoedian Ngo-ing-pang-djit See Tjong Pin, Kim-to Boe Lam Hin dan semoewa para penggawe tinggian dari kadoewa fabriek tenoen telah tiba. Tam Tjoe Sian jang mengepalaken itoe perdjamoean satelah angkat tjangkir araknja memberi hormat pada para-tetamoe, lantas berbangkit dari doedoeknja dan lantas moelai pembitjaraannja bilang:

„Akoe Tam Tjoe Sian ini hari soedah mengoendang dengen hormat pada para hadlirin, maksoed jg.

dikandoeng jalah oentoek mentjari djalan oentoek memoetoesken perkara jang telah terbit di antara kadoewa fabriek tenoen Hin Liong dan Lo Boen Kie. Kim Boen Kiem adalah mantoekoe; Tam Swat Yong adalah poetrikoe aseli. Dan akoe poen tida oesah bitjara maloe-maloe lagi; jaitoe kadatengankoe dari Houw-gee-san kasini, sasoenggoehnja dengen bermaksoed membuat pembalesan.

Seperti Toewan-toewan poen tahoe jang poetrikoe sekarang soedah menjadi kahilangan soewami serta moesna semoewa harta bandanja, dalem kota Yangtjioe ini ia sampe tida bisa berdiam terlebih djaoeh. Djika kita liat ini perkara, perboewatan marika sama sekali boekan seperti perboewatan di kalangan dagang atawa soedagar; ini melaenken ada tjara-tjara perboewatan di kalangan Kang-ouw, jaitoe bales dan membales di antara kadoewa moesoeh. Dari itoe akoe poen soedah ambil ini djalan sematjem itoe djoega — seperti jang kita kenal di kalangan Kang-ouw, boewat membuat beres perkara ini.

Akoe Tam Tjoe Sian dari bermoela memang telah ambil pikiran, begitoe lekas akoe sampe di ini kota, ka satoe akoe aken bikin terbalik fabriek tenoen Hin Liong; oleh kerna ialah jang menjadi kapala dari ini perkara, soedah tentoe akoe tida bisa begitoe sadja. Dan mantoekoe adalah ini Lo-soe jang soedah boenoeh, akoe poen soedah bersoempah tida aken hidoeper berdoewa bersama-sama di dalem doenia ini. Tjoema sadja akoe Tam Tjoe Sian poen telah ngalamken penghidoepan dalem kalangan Kang-ouw boekan sedikit tahoen; soedah tentoe tida maoe berboewat perboewatan jang botjengli. Sasoedah akoe tiba di kota Yangtjioe, terlebih doeloe akoe dengen sanget terliti telah tjari tahoe hal-hal jang bersangkoetan dengen itoe perkara. Akoe poenja mantoe Kim Boen Kiem ternjata memang ia adalah satoe

orang jang keliwat sompong dan menoeroetin sadja iapoenja amarah, tida perna memikirin keadilan terhadep laen orang. Maka itoe achirnya sampe ia moesti alamken kematian.

Maskipoen ia telah terboenoeh oleh ini See Lo-soe, itoelah memang disebabken oleh perboewatannja djoega. Tapi apabila kita pandang dari soedoet prikemanoesia'an, See Lo-soe poenja perboewatan jang paling achir poen ada katerlaloean. Akoe baroesan sadja baroe berkoendjoeng pada See Lo-soe dan kita poen baroe selesei dari itoe perhimpoenan. Maka itoe sekarang akoe soedah mengoendang pada sekalian sobat jang terhormat oentoek dateng ka sini, jaitoe oentoek memberi tahoeken tentang kapoetaesankoe terhadep perkara terseboet tadi.

Tentang permoesoohan memang kita haroes akoei boewat kadoewa fihak poen soesah boewat loepaken, tetapi kita sebrapa bisa haroes singkirken permoesoohan itoe. Oleh kerna — kita haroes inget bahwa djika kita biarken sadja itoe permoesoohan berdjalan teroes, dan di kadoewa fihak mendjalanken lelakon saling bales membales; di fihak orang she Kim begitoe djoega di fihak orang she Boe masing-masing ada mempoenjain toeroenan, maka apabila itoe dilalaiken boekankah selamanja nanti di kadoewa fihak aken mendjalanken pemboenoehan dan dosa-dosa tida ada poetoes-poetoesnya?

Sekarang akoe Tam Tjoe Sian memoehoen dengan sanget soepaja dengen lantas fabriek tenoen Lo Boen Kie bisa mendjalanken lagi perniagahannja, boekan tjoema begitoe sadja; kaselametan dari djanda dan anaknya Kim Boen Kiem begitoe djoega hartanja haroes didjamin betoel-betoel. Dan kasedihan jang telah terbit oleh kerna meninggalnya Kim Boen Kiem memang ada sanget mengenesken; itoelah haroes ada

tanggoengannja fabriek Hin Liong oentoek memberi hiboeran sebagimana moestinja pada marika jang menderita.

Moelai dari ini hari hingga sateroësnja kadoewa fihak oeroeslah masing-masing poenja peroësaahan; satoe sama laen tida boleh saling mengiri atawa mengganggoe. Apabila sampe kedjadian terbit per-selisihan di antara pengawe-penggawe, oesirlah marika jang telah berselisihan itoe dan kadoewa fihak tida boleh pake lagi, oentoek menghindarkem salah faham.

Akoe poenja tjoetjoe-loewar Siao Tiap masih ber-oesiah kaliwat moeda, samentara ia tida aken kom-bali ka kota ini, maka itoe adalah poetrikoe Tam Swat Yong jang aken membangoenken poela peroë-sahannja begitoe djoega roemah tangganja, apabila kamoedian sampe terbit poela hal-hal jang menjoe-sahin atawa mengganggoe padanja, adalah akoe Tam Tjoe Sian jang aken belaken padanja dengen tenaga dan djiwakoe sendiri, begitoe djoega djika achirnja sampe terboekti orang telah tida toeroet poetoesan-koe ini, tentoe tida ada laen djalan lagi selaennja akoe nanti timpalin di mana sadja marika berada." Demikianlah Tam Tjoe Sian toetoep pembijarahan-nja, sambil kamoedian angkat kadoewa tangannja memberiken hormat pada hadlirin.

See Tjong Pin poen lantas berbangkit dari doë-doeknja dan berkata: „Soenggoeh bagoes, Tam Lo-Enghiong! Sasoedahnja kaoe kaloewarken peratoe-ranmoe, betoel-betoelah akoe See Tjong Pin kaoe goemken padamoe; tida mengetjiwaken jang kaoe telah menjadi satoe pendekar dari kalangan Kang-ouw jang sasoenggoehnja sanget bidjaksana. Soedah terang jang kaoe dengen moedah, bila kaoe maœ bikin pembalesan goena Kim Boen Kiem, tapi kaoe

masih bisa pegang tegoh wet alam dan boedi pekerti setjara kemanoesahan. Akoe See Tjong Pin sanggoep djalanken semoewa apa jang kaoe baroesan soedah prentahken."

Baroe sadja ia bitjara sampe di sitoe, kamoedian ia lantas berpaling pada Tan Soe Sin dan laen-laennja, djoega pada semoewa penggawe fabriek tenoen dan berkata lebih djaoeh: „Ini Tam Lo-soe adalah jang diseboet Tjoe-bo-kim-so Tam Tjoe Sian dari Tjip-sian-tjhung; satoe Lo-Enghiong jang ternama. Kemaren malem ia telah berkoendjoeng ka Pek-lauw-teng dan soedah begitoe baek hati tida abisken sallemba djiwakoe ini; ini adalah satoe boedi jang besar bagikoe. Sebaliknya akoe orang she See djadi merasa berdosa padanja, apa poela sekarang ia telah demikian merendah oentoek dapetken kaberesan, maka apabila di antara kita orang masih ada djoega jang nanti membikin katjau apa-apa, soedah tentoe kita tida segan-segan lagi boewat oesir padanja.”

Perkatahan-perkatahan di atas sebaliknya telah menerbitken Tam Swat Yong poenja sedih, tida terasa aer-matanja soedah berlinang seraja berkata: „Ajah, apa jang kaoe telah atoer, apatah kaoe tida merasa bersalah terhadep poetrimoe ini?”

Tam Tjoe Sian mendenger perkatahan poetrinja, mendadak ia djadi merengoet dan berkata: „Ko Naynay, sebagian besar memang kaoe bener, tapi ada doewa hal jang akoe aken tjeritaken padamoe, tentoe kaoe nanti merasa poewas. Soewamimoe telah toeroenken papan merk dari fabriek tenoen Hin Liong, dan bawa depan Boe Lam Hin serta lantas antjoerken itoe di hadepannja; ini tjara boekan semata-mata maoe menghina padanja? Dan apa oemoem bisa memberi ampoen pada perboewatan jang begini koerang adjar? Apalagi djika kita inget pada per-

boewatannja jang begitoe tida mengenal prikema-noesian mendesek pada laen fihak sampe abis-abisan, tida sekali maoe kasih ampoen pada laen orang; dan apabila jang menderita itoe boekan di fihak fabriek tenoen Hin Liong tapi kita sendiri, saharoesnja moesti kita berboewat bagimana?

Maka itoe kemaren malem jang telah kedjadian di Pek-lauw-teng, sabetoelnja akoe jang soedah sengaja mendesek dan memaksa pada itoe orang she See. Inilah akoe tjoema maoe tjoba apa betoel anggepan-koe tadi? Dan ternjata ia sampe beberapa kali mengalah sadja dan sampe achir-achirnya ia tida bisa dapat djalan lagi boewat lolosken diri baroe ia pake sendjata resianja.

Maka itoe akoe berpendapetan binasanja Kim Boen Kiem poen tentoe telah terjadi oleh kerna hal-hal jang saroepa djoega. Ko Naynay dengerlah perkatahankoe, dan djalankenlah prentahkoe tadi!"

See Tjong Pin, Boe Lam Hin, Tan Soe Sin dan laennja berbareng bangoen dan memberi hormat pada Tam Swat Yong sambil berkata: „Kim Toa Naynay, Hari ini harep kaoe soeka bermoerah hati, dan soeka mengalah sedikit. Di belakang hari masatah kaoe tida bisa menjadi senang lagi seperti doeloe. Dan kita orang poen tanggoeng aken memberi bantoean padamoe sebanjak-banjaknja.”

Tam Swat Yong mendenger perkatahan marika, maka ia poen tjoema bisa angkat tangan dan memberi hormat dengan mata jang berlinang.

Sasoedah marika bikin selesai ini perkara, maka Tam Swat Yong poen lantas angkat peti soewaminja dan koeboer dengan oepatjara jang sanget besar. Sama semoewa toko² soetra dan tjita poen tida loepoet pada dateng memberi bantoean dan menganter di hari koeboernja. Begitoe djoega merk Lo Boen

Kie poen moelain dari hari itoe dipasang lagi, menandaken peroesahan poen moelain berdjalan lagi. Dan Siao Tiap tetep berdiam di Tjip-sian-tjhung dengen aki-loewarnja sampe liwat bebrapa tahoen baroe kombali ka kota Yangtjioe lagi. Maka riwajat Tjoe-bo-kim-so poen telah tamat sampe di sini.

— TAMAT —

BATJA'AN SILAT JANG HEIBAT !



Nomer 14 — Tanggal 15 Maart
Tiber
Moeat:
LAM TJIANG SIAO HO HAN.

OBAT BATOEK
Aditama
TERPOEDJI SANGAT
MANDJOER

59741989

Bisa pesen boekoe-boekoe:

„Oh Penghidoepan	oleh: Im Yang Tjoe	f	4.—
„Lajangan Biroe”	” ” ” ”	”	1.75
Tjinta dan Pengorbanan	”	2.25
Si Nonah Merah	oleh: Pouw Kioe An	”	3.—
Drama di Boven Digoel (4 boekoe)	”	25.—
Boenga Roos dari Tjikembang	”	10.—
Drama dari Krakatau	”	7.50
Intan Berlumpur	”	1.50
Buaja Betina	”	1.50
Menurut Djedjak Dipadang Pasir	”	1.50
Dalem Tawanan Djepang	”	8.50
Drama dari Merapi (7 boekoe)	”	12.50
1001 Doenia Gaib	”	5.—
Apakah Artinja Roemah Tangga	”	3.50
Nonton Tjapgoméh	”	2.—
Sair Warisan Djepang	”	2.—
Drama dari Loro-Ireng	”	3.—
Perkoempoelan Resia di Tiongkok	”	5.—
Zonder Lentera (loetjoe)	”	6.—
Moestika (Oct. Nov. Dec. '48)	”	7.50
S e d a r	”	2.—
Kang Ouw Kie Djin Toan (3 boekoe)	”	6.—
Ngo Bie Wie Kiam Kek (3 ”)	”	6.—
It Kie Bwee (1 ”)	”	2.—
Sinpo Spec. Num. '42 dgn. Put On tebel	”	7.50
Sinpo ” ” Jub. 1910/35	” ” ” ”	”	4.50
Sinpo ” ” 1938	” ” ” ”	”	3.50
Nan Yang Post (6 nummer didijilid 1946)	”	15.—
Tjikadoet	”	2.50
Pantjawarna	”	3.—
Star Weekly (1 kwartaal)	”	15.—
Moestika	”	”	5.25
Goedang Tjerita	”	”	12.—
Tjilik Romans	”	”	6.—
Java Critic	”	”	6.—

Semoea trima franco-aang. sasoeda trima postwissel.

ENG HOATPetakbaroe 63 - Batavia-Stad
MAGAZINE DISTRIBUTOR

TJILIK ROMAN'S

Toenggoe MAART-nummer aken moentjoel

„Astana“ dalam Notaha!
d a n

„Iblis“ Beckonde !

Dimoeat tamat,

doea tjerita dalem satoe boekoe.

APRIL NUMMER

Melani !

Moeestika dari Djokjakarta

oleh: Im Yang Tjoe.

Minta lantas berlangganan kapada adm.:

GOEDANG TJERITA

Posttrommel 63 — Batavia-Centrum